



明史稿

傳百六十五之八



內閣文庫		
函	八八	漢
冊	三七	書
架	二八五	類

內閣文庫		
番號	漢	8835
冊數	78	(69)
函號	281	39





明史藁

列傳第一百六十五

光祿大夫 經筵講官明史總裁戶部尚書加七級臣王鴻緒奉

敕編撰

忠義一

花

雲

王愷

孫炎

牟

魯

王綱

王禕

吳雲

熊鼎

易紹宗

琴彭

皇甫斌

張瑛

葉禎

王禎

萬琛

楊忠

吳景

馮源

霍恩

王郁

孔環


孫燧

許達

黃宏

敬慎堂

黃雲山人集 史藁





宋以方

自古忠臣義士爲國捐生節炳一時名垂百世孔子云殺身以成仁司馬遷云死或重於泰山是以歷代史編凡盡忠所事之死靡他者備極表章尚已太祖勅業江左褒余闕福壽比及踐位感蔡子英之書聽使北去依其故主至從龍將士功未就而身亾若豫章康郎山兩廟及雞籠山功臣廟所祀諸人莫不爵贈公侯血食俎豆侑享太廟恤錄子孫以故不數十年靖難師起交爭在於本家大物未嘗易姓而羣臣不憚膏鼎鑊赤姻族以相抗拒也仁宣以後重熙累洽世履太平垂二百餘載中間變阻之征土木之變宸濠之叛以暨神熹兩朝邊陲多故湛身殉難者未易更僕數亦莫不備荷恤

忠之典若後人自陳請而所司失奏者輒嚴旨譙讓故節烈之蹟咸得顯暴於世至莊烈承基運丁陽九生靈塗炭國祚淪胥其時內外諸臣或隕首封疆或致命闕下駢肩接踵蹈死如歸固由忠義性生抑豈非累朝養士之報歟今博采苑都爲八卷其事實繁多及國家興亾所繫或連屬他人本末始明與夫忠諫而死疏草傳誦人口者皆已具前帙若抒忠勝國抗命

興朝稽諸前史例得并書而我

太宗文皇帝寬獎張春不奪其志厲節勸忠道光日月蓋洛邑頑民商家義士厥旨兩行原無或悖云

花雲懷遠人貌偉而黑驍勇絕倫至正十三年從太祖臨濠



克懷遠擒其帥拔全椒襲繆家寨太祖將取滁州率數騎猝遇賊數千雲衛太祖突陣出遂克滁州從取和州獲卒三百授管勾太祖渡江雲先濟既克太平命宿衛左右從克集慶獲卒三千擢總管徇下丹陽丹徒金壇過馬馱沙道遇劇賊擒殺甚衆授前部先鋒從拔常州守牛塘營擢行樞密院判階安遠大將軍克常熟州獲卒萬餘已命趨寧國道殺羣盜數百還守太平二十年閏五月陳友諒以舟師來寇雲與知府許瑗院判王鼎元帥朱文遜率三千人禦之文遜戰死友諒攻三日不克乃以巨舟乘漲令士卒緣舟尾攀堞登城遂陷縛雲急雲怒大呼縛盡裂起奪守者刀殺五六人大罵賊怒碎其首縛於舟檣叢射之而死瑗鼎亦抗罵死太祖卽吳

王位追封雲東丘郡侯瑗高陽郡侯鼎太原郡侯立忠臣祠並祀之方戰急雲妻郜祭家廟挈三歲兒泣語家人曰城破吾夫必死吾義不獨存然不可使花氏無後若輩善撫育之雲被執郜赴水死侍兒孫瘞畢抱兒行被掠至九江軍中惡兒啼孫氏夜投漁家脫簪珥屬養之及漢兵敗孫往漁家竊兒走夜宿陶穴中天明渡江潰軍奪舟去棄江中浮斷木入葦洲採蓮實哺兒七日不死夜半有老父號雷老挈之行踰年達太祖所孫抱兒拜泣太祖亦泣寘兒膝上曰將種也賜雷老衣忽不見兒尋賜名煒累官水軍左衛指揮僉事世宗卽位之歲其五世孫爲遼復州衛指揮請於朝贈郜貞烈夫人孫安人立祠致祭文遜太祖養子也嘗與元帥秦友諒攻



克無爲州瑗字栗夫樂平人元末兩舉鄉第一會試不第放浪吳越間太祖駐婺州瑗謁曰元祚將終四方鼎沸足下欲定天下非延攬英雄難以成功太祖喜寘幕中參軍事未幾命守太平鼎儀真人初爲趙忠養子忠從太祖爲總管克太平授行樞密院判鎮池州趙普勝來寇忠陣歿命鼎嗣職復故姓守太平至是三人皆被難時有劉齊者以江西行省參政守吉安守將李明道召友諒兵至開西門納之殺參政曾萬中陳海執齊及知府宋叔華脅之降二人不屈又攻破臨安執同知趙天麟亦不屈俱送友諒所友諒方攻洪都殺三人徇城下友諒兵陷無爲州執知州董曾亦抗罵不屈沈之江

王愷字用和當塗人通經史元時爲府吏太祖拔太平召愷爲掾從下京口撫定新附民及建中書省用爲都事杭州苗軍數萬降待命嚴州境愷馳諭之偕其帥至太祖克婺州置中書分省調愷都事克衢州命總制軍民事置游擊軍籍丁壯萬餘常遇春守金華部將擾民愷執撻之遇春讓愷愷曰民者國之本撻一部將萬民安將軍所樂聞也遇春乃謝愷開化馬宣江山楊明並爲亂先後討禽之陳友諒寇龍江太祖命胡大海擣廣信以牽制之大海遣元帥葛俊往愷曰廣信漢門戶必重兵守備師撻之設挫衄吾衢繹騷矣大海乃自行至而廣信潰一如愷言尋遷左右司郎中佐大海治省事苗軍作亂害大海執愷欲降之愷正色曰吾守土義當死



寧從賊耶賊帥劉震欲全愷其黨吳得直曰無自貽患遂并其子行殺之愷善謀斷嘗白事未聽却立戶外抵暮不去太祖出怪問之愷諫如初卒從其議後贈奉直大夫飛騎尉追封當塗縣男

孫炎字伯融句容人面鐵色跛一足談辨風生雅負經濟與丁復夏煜游有詩名太祖下集慶召見陳元運將盡請延攬賢豪太祖方建行中書省用爲首掾從征浙東擢池州同知尋進知府召爲行省都事克處州授總制以禮招聘劉基章溢葉琛等基不肯出炎使再往基遺以寶劍炎作詩贈基言劍當獻天子斬不順命者非人臣所宜用封還之且貽書數千言基始就見會太祖來聘遂送詣建康是時城外皆賊壘

城空無一兵苗軍作亂殺院判耿再成執炎及知府王道同元帥朱文剛幽空室脅降皆不屈賊帥賀仁德饋雁酒炎大罵賊怒拔刀叱解衣炎曰此紫綺裘主上所賜吾當服以死遂與道同文剛皆見害年僅三十餘追贈丹陽縣男塑像再成祠道同由中書省宣使遷帳前總管出爲義烏知縣擢知處州贈太原郡侯文剛太祖養子小字柴舍變起欲與再成聚兵殺賊不及遂被難贈鎮國將軍附祭功臣廟

牟魯烏程人爲莒州同知洪武三年秋青州民孫古朴等爲亂襲州城執魯欲降之魯曉之曰國家混一海宇民皆樂業若輩悔過自新可轉禍爲福不然官軍旦夕至無遺種矣我守土臣義唯死所惜者良民耳賊未敢害擁至城南鄒家



莊魯大罵遂殺之已而賊破詔恤其家又有白謙裴源朱顯忠王名善黃里顧師勝陳敬吳得之屬謙葵源知州信州盜蕭明來寇謙力不能禦懷印出北門赴水死源肇慶府經歷以公事赴新興遇山賊陳勇卿被執勒令跪源大罵曰我命官乃跪賊耶遂被殺洪武三年贈官二等顯忠如臯人為張士誠將來降數從征有功以濠梁衛指揮僉事從鄧愈下河州抵土蕃從傅友德克文州遂留守之洪武四年夏蜀將丁世直召蕃數萬來攻却而復至食盡無援或勸走避叱不聽攻益急裹創力戰城破為亂兵所殺千戶王均諒被執不屈磔死友德至世直乃走事聞贈恤有差名善義烏人為高州通判海寇何均善被戮洪武五年其黨羅子仁率眾潛入城

執名善不屈死里雲內州同知洪武五年秋蒙古兵突入城里率兵巷戰力屈死之師勝興化人為峩峩知縣洪武十二年率民兵討賊彭普貴戰死賜勅褒美恤其家敬增城人洪武十四年舉賢良擢禮部郎中左遷雲南曲靖府經歷署劍川州事隣寇來攻城敬禦之官兵寡其下欲退敬瞑目大呼力戰死命恤其家得全椒人洪武中為龍里守禦所千戶三十年古州上婆洞蠻林寬作亂攻城得與鎮守盱眙并爭乞兵貴州都司堅守以待賊燒門急攻得爭開門奮擊得中毒弩死爭戰死贈得指揮僉事爭正千戶子孫世襲恤其家王綱字性常餘姚人與弟秉常敬常並以文學名綱善劉基語之曰老夫樂山林異時得志勿以世緣累我後基竟薦綱



於太祖洪武四年徵至京師年七十矣齒髮如少壯太祖異之策以治道擢兵部郎潮民弗靖除廣東參議督兵餉語所親曰吾命盡此矣以書訣家人攜子彥達行單舸諭降諸亂民還抵增城遇海寇曹真截舟羅拜願得為師綱諭以禍福不從則奮罵賊舁之去為壇坐綱日拜請綱罵不絕口遇害彥達年十六亦罵賊求死賊欲并殺之其酋曰父忠子孝殺之不祥令綴羊革裹父屍而出二十四年御史郭純以聞詔立廟死所歲時祀之彥達以父廕當得官痛父終身不仕王禕字子充義烏人幼敏慧長師黃潛學古文遂以文章名世嘗游元都陳時務七八千言宰相格不以聞危素張起巖輩先後論薦之不報乃南歸益著書名曰盛太祖取婺州召

見用為中書分省掾史征江西禕獻頌太祖喜曰江南有二儒卿與宋濂耳學問之博卿不如濂才思之雄濂不如卿賜而遣之太祖創禮賢館李文忠薦禕及許元王天錫召真館中旋授江南儒學提舉司校理父憂歸服闋除侍禮郎兼引進使尋掌起居注已命同知南康府事賜金帶寵之居官有惠政太祖將卽大位召還議禮坐事忤旨出為漳州府通判洪武元年八月上疏言祈天永命之要在忠厚以存心寬大以為政法天道順人心雷霆霜雪可暫不可常浙西既平科斂當減太祖嘉納之然不能盡從也明年修元史命禕與濂為總裁書成擢翰林待制同知制誥兼國史院編修官奉詔預教大本堂每召對必賜坐久則賜食坐失朝降編修出使



吐蕃未至召還五年正月太祖既平蜀議招諭雲南會北平  
送雲南使者蘇成至乃元梁王把匝刺瓦爾密遣往漠北者  
卽命禕齋詔偕往至則諭王以禍福王未決而元嗣君遣使  
脫脫徵餉脅王以危言必欲殺禕王匿禕民間脫脫請讓王  
王不得已出禕見之脫脫欲屈禕禕叱曰天旣訖汝元命我  
朝實代之汝燭火餘燼敢與日月爭明耶且我與汝皆使也  
豈爲汝屈脫脫益詈王或曰兩國交兵使在其間不從則遣  
之且王公素負重名不可害脫脫攘臂曰今雖孔聖義不得  
存禕顧王曰汝殺我天兵夕至汝禍不旋踵矣遂遇害時十  
二月二十四日也年五十有二梁王遣使致祭具棺衾斂之  
八年九月太祖議再遣使招諭梁王召湖廣行省參政吳雲

語之曰今天下一家獨雲南未奉正朔殺我使臣卿能爲我  
作陸賈乎雲頓首請行時梁王遣鐵知院輩二十餘人使漠  
北爲大軍所獲送京師太祖釋之令與雲偕行旣入境鐵知  
院等謀曰吾輩奉使被執罪且死乃誘雲令詐爲元使改制  
書共給梁王雲誓死不從鐵知院等遂殺雲梁王聞其事收  
雲骨送蜀給孤寺殯之雲宜興人元翰林待制仕太祖歷官  
刑部尚書與禮部尚書陶凱並出爲湖廣參政雲南平雲子  
黻上雲事於朝詔馳傳返葬以黻爲國子生建文中禕子紳  
訟禕事詔贈翰林學士諡文節正統中改諡忠文成化中命  
建祠雲南春秋奉祀弘治中贈雲刑部尚書諡忠節與禕並  
祠改祠額曰二忠紳字仲縉禕死時年十三鞠於兄綬事母



兄盡孝友長博學受業宋濂濂器之曰吾友不亾矣蜀獻王聘紳待以客禮紳啟王往雲南求父遺骸不獲即死所致祭述滇南慟哭記以歸建文帝時用薦名為國子博士預修太祖實錄獻大明鏡歌鼓吹曲十二章與方孝孺友善卒官子孫字叔豐幼師孝孺孝孺被難與其友鄭珣輩潛收遺骸禍幾不測自是絕意仕進初紳痛父亾食不兼味守之不變居喪不飲酒食肉者三年卒門人私諡曰孝莊先生子汶字允達舉成化十四年進士授中書舍人居三年謝病歸讀書齊山下弘治初言者交薦與檢討陳獻章同召未抵京卒熊鼎字伯穎臨川人元末舉於鄉長龍溪書院兵亂結鄉人自守陳友諒襲脅之不應鄧愈鎮江西數延見奇其才太祖

至愈以鼎薦欲官之以親老辭乃留愈幕府贊軍事母喪除名至京師命偕諸儒撰公子書訓貴戚子弟等授德清縣丞松江民錢鶴臯反鄰郡大驚鼎鎮之以靜吳元年召議禮儀除中書考功博士遷起居注宮殿成命類編古人行事可為鑒戒者書壁間舍人耿忠使廣信還奏郡縣官違法狀帝遣御史廉之而時已頒赦書丞相李善長再諫不納鼎偕給事中尹正進曰朝廷布大信於四方復以細故煩御史失信且褻威帝默然久之乃不遣御史洪武改元新設浙江按察司以鼎為僉事分部台温台温自方氏竊據偽官悍將二百人暴橫甚鼎盡遷之江淮間民始安尋奏治温之倡邪教者散其眾為農平陽知州梅謐坐賊辨不巳民數百咸訴知州無



罪鼎將聽之吏白鼎釋知州如故出何鼎歎曰法以誅罪吾  
敢畏譴誅無罪人乎釋謚以情聞報如其奏寧海民陳德仲  
支解黎異異妻屢訴不得直鼎一日覽牒有青蛙立案上鼎  
曰蛙非黎異乎果異止勿動蛙果勿動乃逮德仲鞫實立正  
其罪是秋山東初定設按察司復以鼎爲僉事奏罷不職有  
司數十輩列郡肅清進副使徙晉王府右傅坐累左遷大同  
衛知事復授晉王府參軍召爲刑部主事八年西部朵兒只  
班率部落內附改鼎岐寧衛經歷賜白金寶鈔以行既至知  
寇乃僞降密疏論之帝遣使慰勞賜以裘帽復遣中使趙成  
召鼎鼎等旣行寇果叛遣其下脅鼎鼎責以大義罵之遂  
與成及知事杜寅俱被殺帝聞悼惜命葬之黃羊川立祠致

祭以所食俸米給其家

●勿紹宗攸縣人洪武時從軍北伐有功授象山縣錢倉所千  
戶建文三年倭登岸剽掠紹宗大書於壁曰設將禦敵設軍  
衛民縱敵不忠棄民不仁不忠不仁何以爲臣爲臣不職何  
以爲人書畢命妻李具牲酒生奠之訣而出密令游兵間道  
焚賊舟賊驚救紹宗格戰殺賊多追至海岸陷淖中手刃數  
十賊遂死其妻攜孤奏於朝賜葬祭勒碑旌之

琴彭交阯人永樂中以父安知府署茶籠州事有善政宣德  
元年黎利反率衆圍其城彭拒守七月糧盡卒疲諸將無援  
者巡按御史飛章請救宣宗馳勅責榮昌伯陳智等曰若等  
奏黎利就撫俟涼秋之清化知府任今已秋矣利果赴官否



茶籠守彭被困孤城矢死無貳若等不援將何以逃責急發兵解圍無干國憲勅未至而城陷彭竟死之詔贈交趾左布政使遣使諭祭厚恤其家送一子京師官之時交趾人陳汝石陶季容陳汀亦皆以忠節著汝石初爲陳氏小校大軍南征率先歸附積功至都指揮僉事永樂十七年四叅士官車綿子等叛汝石從方政討之深入賊陣中流矢墜馬與千戶朱多蒲皆死多蒲亦交趾人事聞遣行人賜祭賻其家米布官爲置塚季容世爲水尾縣士官王師下交趾以爲水尾知縣用破賊功進歸化知州久之遷宣化府同知守北閑堡宣德元年遣所部阮執先等追賊至清波縣爲所獲旣而遣還令與縣丞黃矜珠招季容矜珠等脅以兵不爲動宣宗聞之

卽擢宣化知府璽書嘉勞賊復遣人誘季容季容執送沐晟而導官軍至水尾與賊將阮午等戰敗之會王通棄交趾季容義不從賊乃率官屬入朝汀古雷縣千夫長數從方政擊賊有功政信任之王通棄地汀憤恨北行爲賊所得賊壯之授以官令守交州東關汀誓不臣賊擊其家九十餘人從間道走賊追之家屬盡陷惟汀得入欽州帝嘉其義以爲指揮僉事厚賚之他若士官阮世寧七源州士官阮公庭亦皆不願從利率所部來歸乞居龍州凍州之地帝命加意撫恤資糧器用皆官給之

皇甫斌壽州人先爲興州右屯衛指揮同知都指揮巫凱薦其才調遼海衛忠勇有智略遇警輒身先士卒宣德五年十



月勒兵禦寇至密城東峪自旦及晡力戰矢盡援絕子弼以身衛父俱戰死千戶吳貴百戶吳襄毛觀並驍勇出必衝鋒至是皆死斌等雖死殺傷過當寇亦引退事聞詔有司褒恤張瑛字彥華浙江建德人永樂中舉於鄉入國學除刑部主事進員外郎正統時擢建寧知府鄧茂七作亂瑛爲守禦計甚備賊二千餘迫城結砦四出剽掠瑛率建安典史鄭烈會都指揮徐信軍分三路乘霧襲之斬首五百餘遂拔其砦進右參政仍知府事烈亦遷主簿茂七既誅其黨林拾得等轉掠城下瑛與從父敬禦之賊敗乘勝逐北陷伏中敬死瑛被執大罵不屈死詔贈福建按察使賜祭官其子熙羅田王簿弘治中建寧知府劉輿請於朝立祠致祭時泉州守熊尚初

亦以拒賊被執死尚初南昌人初爲吏以才擢都察院都事進經歷正統中用都御史陳鑑薦遷泉州知府盜起上官檄尚初監軍不旬日降賊數百已而賊逼城下守將不敢禦尚初憤提民兵數百與晉江主簿史孟常陰陽誦術楊仕弘分統之拒於古陵坡兵敗皆遇害郡人哀之爲配享忠臣廟葉禎字夢吉高要人舉於鄉授潯州府同知補鳳翔調慶遠兩廣徭賊蠱起列郡咸被害將吏率縮牖觀望禎誓不與賊俱生募健兒日訓練峒酋韋父強數敗官軍禎生繫之奪還子女畜產無算其黨忿悉衆攻城旗山守將擁兵不救禎出戰賊却去旋躡禎戰相當禎子公榮殲焉頃之賊圍雞刺諸村禎率三百人趨赴道遇賊人頭山下鏖戰禎被數鎗手刃



賊一人與從子官慶及三百人皆死時天順三年正月晦也嶺南素無雪是夜大雷電雪深尺許賊釋圍去諸村獲全贈朝列大夫廣西參議立廟祀之

王禎字維禎吉水人祖省死靖難兵自有傳成化初禎由國子生授夔州通判二年荆襄石和尚流劫至巫山督盜同知王某者怯不救禎面數之若食朝廷祿忍委赤子虎口耶卽代勒所部民兵晝夜行至則城已陷賊方聚山中禎擊殺其魁三十三人餘盡遁乃行縣撫傷殘招潰散久乃得還甫三日賊復劫大昌禎趣同知行同知不應指揮曹能柴成與同知比激禎曰公爲國出力肯復行乎禎卽請往兩人酌酒賀僞許相左右禎上馬挾兩人與俱夾水陣旣渡兩人見賊卽

走禎被圍半日誤入淖中賊執欲降之禎大罵賊怒斷其喉及右臂而死從行者奉節典史及部卒六百餘人皆死自死所至府三百餘里所乘馬奔歸血淋漓毛盡赤衆始知禎敗往覓屍面如生子廣鬻馬爲歸費王同知得馬不償直視旣行馬夜半哀鳴王同知起視之馬驟前嚙項擣其胸翼日嘔血死人稱爲義馬事聞贈禎僉事錄一子能成皆被譴

萬琛字廷獻宣城人慷慨負氣節成化十三年舉於鄉授清江知縣弘治中補瑞金十八年正月劇盜大至縣人洶洶逃竄有勸琛急去者琛斥之率民兵數十人迎敵殺賊二十餘人相持至明日力屈被執罵不絕口賊攢刺之乃死贈光祿少卿賜祭葬予蔭時有王祐者爲廣昌知縣賊至民盡逃援



兵又不至祐拔刀自刎其腹曰有城不能守何生爲左右奔奪其刀後援兵集賊稍退越七日復突至祐倉皇赴敵死之楊忠寧夏人世官中衛指揮使以功進都指揮僉事廉介有謀勇正德五年安化王宣鐸反其黨丁廣將殺巡撫安惟學忠在惟學側罵曰狗賊敢犯上耶廣怒殺之迄死罵益厲忠同官李睿聞變馳至宣鐸所門閉不得入大罵爲賊所殺百戶張欽不從逆走至雷福堡亦被殺皆贈官贈蔭表忠睿曰忠烈之門欽曰忠節之門

吳景南陵人弘治九年進士正德中歷官四川僉事守江津重慶人曹弼亾命播州糾衆寇川南謀與大盜藍廷瑞合六年正月逼江津御史俞緇遁去屬景及都指揮龐鳳禦之

邀景俱走景不可率典史張俊迎擊手殺三賊矢被面急收兵入保城已陷大呼曰寧殺我毋殺士民賊強之跪不屈遂被殺俊亦死巡撫林俊上其事詔贈景副使賜祭葬立祠江津世廕宣州衛百戶是月僉事王源行部川北會藍廷瑞鄢本恕等掠通巴至營山源率典史鄧俊禦之皆爲所殺贈源副使亦廕其子源五臺人弘治十二年進士明年正月賊麻六兒越百丈關將逼川東副使馮傑追擊於蒼溪俘斬頗衆日晡移營鐵山關賊乘夜衝突傑死之贈按察使賜祭葬諡恪愍世廕百戶而是時略陽知縣孫璽劍州判官羅明梁山主簿時植亦皆死於賊璽字廷信代州人舉於鄉連知諸城扶風縣都御史藍章以略陽漢中要地舊無城而其令嚴順



懦不足任檄璽往城之工未畢而賊至順欲去璽拔刀斫坐  
凡曰欲去者視此乃率寮屬堅守數日城陷璽被執大罵不  
屈賊斃殺之順逃去誣璽俱逃溺於江以他人屍斂璽子啟  
視非是訟於朝勘得死節狀贈光祿少卿賜祭予廕抵順罪  
明以吏起家鄆本恕逼其城與子介拒守城陷父子皆罵賊  
死植字良材通許人由國子生授官時攝縣事賊方四等略  
地植拒却之斬獲數十級踰月復至相拒數日城陷說降之  
不屈脅取其印不予大罵被殺妻賈聞變卽自縊女九歲赴  
火死明植皆贈恤如制而表植妻女爲貞烈本恕等攻剽城  
邑所向崩潰其士民冒死殺賊者有趙趣徐敬之雷應通袁  
璋之屬趣梁山諸生賊攻城同友人黃甲李鳳何瑛蕭銳徐

宣揚茂寬趙采誓死拒守城陷皆死都御史林俊嘉其義立  
祠祀之敬之亦梁山人流賊起衆推爲部長陷陣死俊爲文  
祭之而題其墓曰忠勇義士應通嘉州人賊衝百丈關應通  
父子七人倡義死戰被執慷慨就死無一乞憐者璋江南人  
素以勇俠聞俊委勦賊所在有功後爲所執其子襲挺身救  
之連殺七賊亦被執俱死襲死三日兩目猶睜視其父俊爲  
詩挽之榜其門曰父子忠節總制彭澤爲勒石城隍廟祀於  
忠孝祠

霍恩字天錫易州人弘治十五年進士歷知山陽安邑正德  
時改上蔡六年賊四起中原郡邑多破殘畿內則棗強知縣  
段豸大城知縣張汝舟河南則恩及西平知縣王佐葉縣知



縣唐天恩永城知縣王鼎裕州同知郁采固始丞曾基夏邑  
永安宣息縣主簿邢祥睢寧主簿金聲丘紳西華教諭孔環  
山東則萊蕪知縣熊驂南畿則靈璧主簿蔣賢皆抗節死而  
恩佐采環死最烈恩與典史梁遠共守當賊至時語妻劉曰  
腕有急汝若何劉願同死乃築臺解後約曰見我下城卽賊  
入矣及城陷恩提刀下城劉臺上見之卽自縊未絕復以簪  
刺心死恩被執賊脅之跪罵曰吾此膝肯爲賊屈乎賊日殺  
人於前以懾之罵益厲賊以刀抉其口支解之遠自經死佐  
手殺賊數十人矢斃其渠帥賊忿急攻三日佐力屈被執罵  
不絕口賊懸諸竿殺而支解之采與都指揮詹濟鄉官任賢  
共堅守斬獲多城陷被執采罵賊不輟賊碎其輔頰而死濟

亦不屈死賢嘗爲御史方里居招邑子三千共守亦罵賊死  
一家死者十三人環被執賊曰呼我王卽釋汝環厲聲曰我  
恨不得碎汝萬段肯媚汝求活耶遂被殺豸正德時官兵科  
都給事中以黨劉瑾謫官賊至連戰却之及城陷中四矢一  
鎗瞑目大呼殺賊而死賊屠其城汝舟與主簿李銓迎賊戰  
爲所殺天恩與父政等七人俱死鼎城陷繫印於肘端坐待  
賊不屈死基被執使馭馬不從死之宣初授官賊楊虎逼其  
境或勸無往宣兼程進抵任七日賊大至拒守有功城陷死  
之祥已致仕城陷罵賊死聲紳與義士朱用之迎戰死驂爲  
賊所執與主簿韓塘俱不屈死蔣賢戰敗被執死之諸人死  
節事聞皆贈官賜祭予廕立祠如典制恩妻劉贈宜人建忠



節坊旌之用之亦被卹佐字汝弼潞州人舉人采字亮之浙江山陰人進士由主事謫教諭遷官環南宮人由歲貢生授來安知縣爲劉瑾黨所陷左遷豸字世高澤州人隸籍錦衣衛起家進士天恩鼎基宣祥聲紳驂蔣賢達塘皆無考時有鄭寶者爲鬱林州同知署北流縣事妖賊李通寶逼其城與子宗珪出戰皆死有王振者爲福建黃崎鎮巡檢海寇大至率三子臣朝實迎戰竟日伏兵起振被殺屍僵立三子救之臣重傷朝實皆死有蔡顯者爲萊州衛指揮僉事與三子淇英順俱禦盜力戰死皆予恤有差

孫燧字德成餘姚人弘治六年進士授刑部主事再遷郎中正德時歷河南右布政使當是時寧王宸濠有逆謀結幸臣孫燧中官張雄輩日夜調中朝事幸有變又劫持羣吏賂遺之使爲已用副使胡世寧暴其狀得罪惡巡撫王哲不附已毒之得疾乞歸踰年死董傑代哲僅八月亦死自是官其地者惴惴以得去爲幸代傑者任漢俞諫皆歲餘罷歸朝議欲得才節大臣燧在河南有聲以故共推用燧十年十月以右副都御史巡撫江西燧聞命歎曰是投我艱也當死生以之乃遣妻子還鄉止攜二僮入南昌南昌人洶洶謂宸濠旦暮且得天子諸黨附及羣盜相依倚作聲勢燧左右亦多爲耳目刺燧言動輒馳告而燧防察甚密卽左右不得窺時時爲宸濠陳說大義冀其警悟卒不悛陰察副使許逵忠勇可屬大事多與謀又懲胡世寧事未敢訟言於朝託禦他寇曲爲



備先城進賢次城南康瑞州惠建昌縣多盜割其地別置安義縣以漸弭之而請復饒撫二州兵備撫不得復則請勅湖東分巡兼理之九江當湖衝最要害請重兵備道權兼攝南康寧州武寧瑞昌及湖廣興國通城以便控制廣信橫峯青山諸窰地險人悍則請設通判駐弋陽兼督旁五縣兵又恐宸濠劫兵器假討賊盡出之他所宸濠瞞燧圖已使人語諸幸臣去燧而遺燧棗梨二物以示意燧笑却之達勸燧先發後聞燧曰奈何予賊以名且需之十三年江西大水宸濠素所蓄賊凌十一吳十三閔念四等出沒鄱陽湖燧與達密謀捕之三賊遁沙井燧自江外掩捕夜大風雨不克濟三賊走匿宸濠林墓間於是密疏白其狀且言宸濠必反章七上輒

爲宸濠遮獲不得達宸濠恚甚因宴毒燧不死燧乞致仕又不許日益憂懼數月髭髮盡白明年宸濠脅鎮巡官奏其孝行燧與巡按御史林潮冀藉是少緩其謀乃共奏於朝朝議方降旨責燧等會御史蕭淮盡發宸濠不軌狀詔重臣宣諭宸濠聞遂決計反六月乙亥宸濠生日宴鎮巡三司明日燧及諸大吏入謝宸濠伏兵左右大言曰孝宗爲李廣所悞抱民間子我祖宗不血食者十四年矣今太后有詔令我起兵討賊亦知之乎衆相顧愕眙燧直前曰安得此言果有詔請出示之宸濠曰毋多言我往南京汝當扈駕燧大怒曰汝速死耶天無二日吾豈從汝爲逆哉宸濠怒叱燧燧益怒張目直視宸濠起入內殿易戎服出麾兵縛燧諸司股栗達獨奮



曰汝曹安得辱天子大臣因以身翼蔽燧遂并縛達二人且縛且罵不絕口賊擊燧折左臂與達同曳出達謂燧曰我勸公先發者知有今日故也已遇害惠民門外巡按御史王金布政使梁宸以下咸稽首呼萬歲宸濠遂發兵偽署三賊爲將軍首遣婁伯徇進賢爲知縣劉源清所斬招黨賊賊畏守吏不得發大索兵器於城中不得賊多持白挺伍文定起義兵設兩人木主於文天祥祠率吏民哭之遂引軍與王守仁共平賊諸逋賊走安義皆見獲無脫者人於是益思燧功燧生有異質遇事挺然不撓兩目爍爍夜有光死之日天忽陰慘烈風驟起凡數日城中民大恐走收兩人屍屍未變黑雲蔽之蠅蚋無近者明年守臣上其事於朝未報世宗卽位贈

禮部尚書諡忠烈與達並祠祀南昌賜祠名旌忠各蔭一子世錦衣百戶尋俱進千戶燧子堪在家聞父訃率兩弟焜陞赴之會宸濠已禽乃扶柩歸兄弟廬墓蔬食三年有芝一莖九葩者數本產墓上服除以父死難更墨衰三年世稱三孝子堪字志健爲諸生能文有膂力善騎射旣官錦衣中武會試第一擢署指揮同知善用強弩教弩卒數千人以備邊歷都督僉事事母楊氏至孝母年九十餘歿京師堪年亦七十護喪歸在道以毀卒贈都督同知巡按御史趙炳然上堪孝行得旌堪子鈺亦舉武會試官都督同知鈺子如津都督僉事焜字仲泉文學通贍以選貢生歷尚寶丞供事內閣理誥勅官尚寶卿居母喪以毀聞陞官尚書焜孫如游大學士



如游孫嘉績僉事陞子鑑鑛皆尚書銜侍郎錄太僕卿鑰子如法主事如洵參政並以文章行誼世其家世以此推餘姚孫氏陞鑑鑛如游如法嘉績事皆別見

許遠字汝登固始人正德三年進士長身巨口猿臂燕頤沈靜有謀略授樂陵知縣六年春流賊劉七齊彥名焚屠城邑殺長吏諸州縣率閉門守甚者乞賊毋攻城遺之芻粟弓馬或棄城遁遠之官慨然為戰守計縣無城督民版築不踰月城成使民於屋外築牆高過其簷啟圭竇才容人家令一壯者執刃伺於竇內餘皆入隊伍令日守吾令視吾旗鼓違者軍法從事又募死士伏巷中洞開城門賊果至旗舉伏發竇中人皆出賊大驚走斬獲無遺後數犯數却之遂相戒不敢

近事聞進秩二等時知縣能抗賊者益都則牛鸞郟城則唐龍汶上則左經濟則陳滯然所當賊少而遠累禦大賊有功遂與鸞俱超擢兵備僉事遠駐武定州轄旁近諸州縣至則城圯溝平不格牛馬遠築城鑿池設樓櫓置巡卒明年五月賊楊寡婦以千騎犯濰縣指揮喬剛禦之賊少却遠追敗之高苑令指揮張勛邀之滄州先後俘斬二百七十餘人未幾賊別部錢鸞以百騎掠德平遠盡殲之威名大著十二年遷江西副使時宸濠暴橫甚遠每繫其黨繩以法嘗言於孫燧曰寧王敢為暴者恃權臣也權臣左右之者貪重賄也重賄由於盜藪今惟翦盜則賄息賄息則交解交解則黨孤不然後難圖也燧深然之每事輒與密議及宸濠反縛燧遠爭之



宸濠素忌達問許副使何言達曰副使惟赤心耳宸濠怒曰我不能殺汝即達罵曰汝能殺我天子能殺汝汝反賊萬段襟汝汝悔何及遂并縛達曳出斫其頸屹不動賊衆共推抑令跪卒不可得遂死年三十六初達以文天祥集貽其友給事中張漢卿而無書漢卿語人曰寧邸必反汝登其爲文山乎達父家居聞江西有變殺都御史副使卽爲位易服哭人怪問故父曰副使必吾兒也世宗卽位贈左副都御史諡忠節廕一子世錦衣千戶又錄山東平賊功復廕子百戶嘉靖元年詔達死事尤烈而燧未愜物論將罷燧祀專祀達廷議請改贈達禮部尚書進廕指揮僉事易王居燧左久之復如初長子場好學有器識旣葬父日夜號泣六年而後就廕人

或詣之場曰吾父死場乃因得官痛哭不能仰視場與燧諸子皆以孝稱場子郊事親孝隆慶中舉於鄉數試禮部不第有試官與場婚姻慕郊才欲物色之郊曰若此何以見先忠節地下許氏子孫不如孫氏貴顯然亦能傳其家當宸濠初發難殺孫許盡劫諸司下獄奪其印參議黃宏主事馬思聰並抗節死死稍後者復有宋以方

黃宏字德裕鄞人著籍孝陵衛舉弘治十五年進士知萬安縣民好訟訟輒禱於神宏毀其祠曰今在何禱也訟者至輒片言折之用才調泰和遷戶部主事歷江西左參議按湖西嶺北二道王守仁討橫水桶岡賊宏主餉以功加俸一等賊閔念四旣降復恃宸濠勢剽九江上下宏發兵捕之走匿宸



濠祖墓中盡得其輜重以歸宸濠逆節益露士大夫以為憂  
宏正色曰國家不幸有此我輩守土死而已民有持大義不  
從宸濠黨者宏每陰左右之及反被執宏憤怒以手楛向柱  
蹙項是夕卒賊義而棺斂之子紹文奔赴求得其棺以偽命  
治斂非父志亟易之扶歸馬思聰字懋聞莆田人弘治末舉  
進士為象山知縣復二十六渠溉田萬頃改知平鄉治戰守  
具盜不敢犯遷南京戶部主事督糧江西駐安仁值宸濠生  
日或勸弗往思聰曰吾欲覘之疾報天子耳被執繫獄不屈  
絕食六日死世宗立贈宏太常少卿思聰光祿少卿並配饗  
旌忠祠嘉靖二年江西巡撫盛應期言前副使周憲討賊遇  
害宜如宏思聰例祀之旌忠祠而御史鄧顯麒謂宏思聰死

節非真不當祀俱下禮官議遂奪二人贈官并罷配祀而祔  
憲忠烈祠明年給事中毛玉勘江西逆黨請表章宏思聰及  
承奉周儀又六年宏子紹武訴於朝下所司核實巡按御史  
穆相列上二人死節狀甚悉禮部尚書李時等請復贈官配  
祀帝難之下廷臣博議無異言乃報許憲安陸人弘治六年  
進士除刑部主事進員外郎十七年坐事下詔獄謫兗州通  
判正德初復故官歷江西副使華林馬腦賊方熾承總督陳  
金檄勦禽數百人移軍奉新計禽賊首胡雪二平馬腦砦華  
林賊懼分立仙女砦拒守憲進克之賊又立砦雞公嶺復為  
憲所拔先後斬獲千計逼華林遏其奔軼賊窘遣謀者詭言  
饑困狀憲信之移檄會師夾擊他將多觀望憲攻北門三戰



賊稍却與子幹先登逼之賊下木石如雨軍潰憲中槍幹前  
救力戰墮崖死憲創重被執罵不絕口爲賊支解久之事始  
聞贈按察使子祭葬謚節愍廕子錦衣世百戶旌幹門曰孝  
烈後六年從給事中李鐸言命有司歲給其家米二石帛二  
匹

宋以方字義卿靖州人弘治十八年進士除戶部主事歷郎  
中數權關稅理倉督逋賦並以清勤聞正德十年遷瑞州知  
府時華林大盜甫平瘡痍未復以方悉心撫字吏民愛之宸  
濠逆謀有萌而瑞故無城郭以方築城繕守具募兵三千日  
夕訓練宸濠深忌之有徵索又堅拒不應以是積忤迫鎮守  
劾繫南昌獄其明日宸濠反破獄出以方脅之降不可械舟

中與俱行至安慶兵敗問地何名舟子言黃石磯江西人音  
則王失機也宸濠以爲不祥遂斬以方祭江後賊平其子崇  
學行求遺骸不得乃斂衣冠歸葬之嘉靖六年有爲宸濠駕  
舟者目覩以方之死爲人言之巡撫副都御史陳洪謨上其  
事詔贈光祿卿廕一子立嘉忠祠瑞州以祀之方宸濠之反  
江西也所在惡少年多入其黨抗賊者卒遇害前後不可勝  
紀其可知者萬木鄭山俱新建人宸濠遣閹校四出籍民田  
廬收縛豪強不附者以去木與山集鄉人結砦自固賊黨謝  
重一馳馬入村執之積葦張睢陽廟壇前縛重一并馬生焚  
之濠黨不敢犯二人飲江上爲盜凌十一所逼趣見宸濠烙  
而椎之皆罵賊死趙楠南昌諸生也兄模嘗捐粟佐賑宸濠



夜捕模索金楠代模往脅以威不屈被掠死同邑辜增見迫抗節不從一家百口皆死諸生劉世倫儒士陳經官義士李廣源皆被掠不屈死葉景恩者以俠聞族居吳城宸濠將作難捕景恩脅降之不從死獄中宸濠兵過吳城景恩弟景允以三百人邀擊賊分兵焚劫景允家其族景集景修等四十人皆死又有閩順者為寧府典寶副宸濠將反順與典膳正陳宣內使劉良微言不可為典寶正涂欽所譖三人懼誅潛詣京師上變羣小庇宸濠反下之詔獄榜掠備至宸濠聞三人赴都慮事泄誣奏其罪且嗾羣小必殺之會已各決五十遣戍孝陵乃免世宗立復官

明史藁

列傳第一百六十五終

明史藁

列傳第一百六十六

光祿大夫 經筵講官明史總裁戶部尚書加七級臣王鴻緒奉 敕編撰

忠義二

王冕	陳聞詩	王鈇	<small>錢 錢 朱 洋</small>
錢鏐	黃鈞	王德	
汪一中	蘇夢暘	潘宗顏	
張銓	何廷魁	高邦佐	
崔儒秀	張振德	董盡倫	
龔萬祿	管良相	徐朝綱	<small>楊以成 鄭鼎</small>
姬文胤	鄭國昌	黨還醇	



李獻明

張春

王冕字服周洛陽人正德十二年進士除萬安知縣寧王宸濠反列城長吏多奔竄冕募壯士從王守仁攻復南昌宸濠還兵鄱陽官軍戰不利冕獻火攻策敗其兵宸濠窘易小舟攜宮女遁冕部卒棹漁舟追及之宸濠投水不死并宮女執送冕所冕以送守仁功未及叙坐他事落職世宗踐阼錄前功擢兵部主事巡視山海關嘉靖三年十二月遼東妖賊陸雄李真等作亂突入關從吏欲扶冕出走冕不可曰吾有親在走安之急趨母所執兵以衛賊至母被傷冕奮前救之被執脅以白刃大罵遂見害詔贈光祿少卿有司祠祀世宗嗣位之歲寧津盜起轉掠至德平知縣龔諒率吏民禦之力屈

被殺贈濟南通判恤其家

陳聞詩字廷訓柘城人嘉靖中舉於鄉以親老絕意仕進親歿居喪哀毀三十二年秋賊師尙詔陷歸德聞詩名欲劫為帥已陷柘城擁之至誘說百端不屈引其家數人斬之曰不從滅而族聞詩給曰必欲吾行母殺人母縱火賊許諾擁以行聞詩遂不食至鹿邑自經死董倫歸德檢校也尙詔入歸德知府及守衛官皆遁倫率民兵巷戰被執垂死猶手刃數賊妻賈及童僕皆從死詔贈聞詩鳳陽同知倫歸德同知並立祠死所

王鈇字德威順天人嘉靖二十九年進士授常熟知縣濱海多大猾匿亡命作奸鈇悉貫其罪俾為已用倭患起鈇語諸



猾曰何以報我咸請效死於是立耆長部署子弟得數百人合防卒訓練縣故無城鈇率士卒城之倭來薄數禦却之已自三丈浦分掠常熟江陰參政任環令鈇與指揮孔燾分統官民兵三千破其寨斬首百五十有奇焚二十七艘餘倭走江陰時邑人錢泮字鳴聲以江西參政里居忿倭蒸其父柩從鈇城守耦而射有功及倭掠旁縣方舟由尚湖還海鈇憤曰賊尚敢涉吾地耶必擊殺之泮亦力從與乃用小艇數十躡倭夾擊之隘中獨者長數人從皆力鬪死鈇陷淖暈目大呼腹中刃死泮被數鎗殺三賊而死時三十四年五月也逾月江陰知縣錢錞崇明知縣唐一岑死之是年倭犯揚州同知朱哀死之明年犯無爲同知齊恩死之詔贈泮光祿卿

鈇太僕少卿並廕錦衣世百戶遣官諭祭立祠死所歲時奉祀錞一岑贈光祿少卿建祠致祀錞世廕錦衣百戶一岑廕國子生哀贈左參政錄一子恩贈光祿丞錄一子恩舉家殉難厚恤其家而環所將士兵莒州人孫鏜以戰死亦贈光祿丞錄一子諸抗倭死者慈谿杜文明與子槐皆贈官文明府經歷槐光祿丞建祠並祀廕槐子國子生尤異數云錞字鳴叔鍾祥人嘉靖二十九年進士初授官倭已熾三十三年入犯鄉民奔入城者萬計兵備道王從古不納錞曰民死不救守空城奚爲遂開門縱入而身自搏戰於斜橋三戰却之明年倭據蔡涇聞分衆犯塘頭錞提狼兵戰九里山薄暮雷雨大作伏四起狼兵悉奔錞戰死一岑建新城成議徙居爲千



戶高才翟欽所沮倭突入一岑戰且詈諸梗議者遂爲亂軍所殺衷字崇晉鄞西人嘉靖中舉於鄉署鞏縣教諭事遷武功知縣抑豪強祛積弊關中有鐵漢稱遷佐揚州吏無敢索民一錢倭入犯擊敗之沙河殲其酋還所掠生口甚衆未幾復大至薄城東門督兵奮擊兵潰死焉恩率舟師敗倭於團山北等港斬首百餘級子嵩年十八最驍勇擊倭至安港伏發被圍恩家二十餘人俱力戰死惟嵩等三人獲全鏜商販吳越倭擾松江謁郡守自請輸貲佐軍守薦之參政翁大立試以雙刀若飛會環窘鏜突圍出之遣人還莒括家貲悉召里兒爲爪牙吳中倚鏜若長城倭舟渡泖澆鏜突出酣戰竟日援兵不至還至石湖橋半渡伏火起鏜墮水中刃死槐字

茂卿倜儻任俠縣僉其父文明爲部長令團結鄉勇槐傷父老以身任之數敗倭副使劉起宗因委槐守餘姚慈谿定海遇倭定海之白沙一日戰十三合斬三十餘人馘一酋身被數鎗墮馬死文明擊倭鳴鶴場斬首一人倭驚遁稱爲杜將軍無何追至奉化楓樹嶺戰歿

黃釧字珍夫安溪人由舉人歷官温州同知嘉靖三十四年倭入犯釧擊走之知倭必復來日夜爲死守計又三年倭果大至釧出城逆擊分軍爲三釧將中軍其二軍帥皆統袴子約左右相應援及釧與倭遇倭遣衆分掩二軍而以銳卒當中軍釧發勁弩巨礮戰良久倭方不支二軍帥望敵而潰倭合兵擊釧釧腹背受敵爲倭所得脅之降不屈令以金贖釧



且笑且罵曰爾不知黃大夫不愛錢耶倭怒裸而寸斬之子  
購屍不獲具衣冠葬事聞贈浙江參議官一子有司建祠是  
年倭陷福清舉人陳見率眾禦之與訓導鄔中涵被執大罵  
而死倭乘勝犯惠安知縣番禹林咸拒守五晝夜倭引去已  
復至咸擊之鴨山乘勝逐北陷伏死贈泉州同知賜祠任一  
子其陷興化延平同知奚世亮署府事守踰月城陷力戰死  
贈右參議廕子賜葬世亮字明仲黃岡人先是三十一年台  
州知事溧水武曄追倭釣魚嶺力戰死上官不以聞其子尚  
實訴於朝乃贈太僕丞而廕尚實爲國子生

王德字汝修永嘉人嘉靖十七年進士授東昌推官父喪除  
補大名徵授戶科給事中定國公徐延德可無極諸縣閒田

爲業且言私置莊田不當以災傷免賦德抗疏劾之俺荅圍  
都城屢陳軍國便宜悉報可時城門盡閉避難者不得入號  
呼徹西內德以爲言民始獲入寇退命募兵山東所得悉驍  
勇爲諸道最還朝會李默長吏部怒德投刺佯出爲嶺南兵  
備僉事與撫按爭事投劾徑歸默復起吏部用前憾落職閒  
住德鄉居憤倭亂奉母居城中而傾貲募健兒爲保障計三  
十七年夏倭自梅頭至大掠德偕族父沛督義兵擊之宵遁  
俄一舟飄至突來犯沛及族弟崇堯崇修殲焉亾何倭復至  
大掠德憤怒勒所部追襲至龍灣軍敗手射殺數人罵賊死  
然倭自是有所忌不敢越德鄉侵郡城矣事聞贈太僕少卿  
世廕錦衣百戶立祠曰愍忠沛贈太僕丞立祠于廕



汪一中字正叔歙人嘉靖二十三年進士由開封推官屢遷江西副使四十年鄰境賊入寇薄泰和一中方讎投箸起曰賊鼓行西掩我不備民無噍類豈飲酒時乎遂罷會居無何當路以討賊屬之先是泰和巡檢劉芳力戰死賊怒磔其尸一中至率諸將吏祭曰爾職抱關猶死疆事吾待罪方面不滅賊何以生為遂誓師列陣鼓之俘五人斬首以徇旦日陣如前會賊至左右軍皆潰賊悉赴中軍中軍潰一中躍馬當賊鋒殺三人脰脇中鎗二臂中刃三與指揮王應鵬千戶唐鼎皆死之贈光祿卿諡忠愍卹典如制妻程投井未死送一中喪不食五日竟死

蘇夢暘萬曆間為雲南祿豐知縣三十五年十二月武定賊

鳳騰霄反圍雲南府城轉寇祿豐夢暘率民兵出城力戰賊退去明年元日方朝服祝釐賊出不意襲陷其城執之去不屈死贈光祿少卿有司建祠錄其一子當祿豐之未陷也賊先犯嵩明州吏目韋宗孝出禦而敗合門死之贈本州同知廕子入國學有龍旌者雲南趙州人由歲貢生為嵩明州學正賊薄城被執罵賊死贈國子博士

潘宗顏字士瓚保安衛人善詩賦曉天文兵法舉萬曆四十四年進士授戶部主事歷郎中數上書當路言遼事當路不能用以宗顏知兵命督餉遼東旋擢開原兵備僉事四十六年馬林將出師宗顏上書經略楊鎬曰林庸懦不堪當一面乞易他將以林為後繼不然必敗鎬不從命宗顏監林軍出



三岔口營稗子峪夜聞杜松敗林軍遂譁及旦

大清兵大至林恐甚一戰而敗策馬先奔宗顏殿後奮呼衝擊膽氣彌厲自辰至午力不支與遊擊寶永澄守備江萬春贊理通判董爾礪等皆死焉事聞賜祭葬贈光祿卿再贈大理卿廕錦衣世百戶謚節愍立祠奉祀永澄等亦賜恤如制張銓字宇衡沁水人萬曆三十二年進士授保定推官擢御史巡視陝西茶馬以憂歸起按江西遼東總兵官張承蔭敗歿而經略楊鎬方議四道出師銓馳奏言敵山川險易我未能悉知懸軍深入保無抄絕且突騎野戰敵所長我所短以短擊長以勞赴逸以客當主非計之得昔臚胸河之戰五將不還奈何輕出塞爲今計不必徵兵四方但當就近調募屯

集要害以固吾圉厚撫北關以樹其敵多行間諜以攜其黨然後伺隙而動若加賦選丁騷擾天下恐識者之憂不在遼東因請發帑金補大僚宥直言開儲講先爲自治之本又言李如柏杜松劉綎以宿將並起宜責鎬約束用一事權唐九節度相州之潰可爲明鑑又言廷議將恤承蔭夫承蔭不知敵誘輕進取敗是謂無謀猝與敵遇行列錯亂是謂無法率萬餘之衆不能死戰是謂無勇臣以爲不宜恤又論鎬非大帥才而力薦熊廷弼四十八年夏復上疏言自軍興以來所司創議加賦畝增銀三釐乃未幾至七釐又未幾至九釐辟之一身遼東肩背也天下腹心也肩背有患猶藉腹心之血脉滋灌若腹心先潰危亡可立待今竭天下以救遼遼未必



安而天下已危今宜聯人心以固根本豈可朘削無已驅之使亂且陛下內廷積金如山以有用之物置無用之地與瓦礫糞土何異乃發帑之請叫閹不應加派之議朝奏夕可臣殊不得其解銓疏皆關軍國安危而帝與當軸卒不省縱松賊時謂銓有先見云熹宗卽位出按遼東經略袁應泰下納降令銓力爭不聽曰禍始此矣天啟元年三月瀋陽破銓請令遼東巡撫薛國用帥河西兵駐海州薊遼總督文球帥山海兵駐廣寧以壯聲援疏甫上遼陽被圍軍大潰銓與應泰分城守應泰令銓退保河西以圖再舉不從守三日城破被執不屈欲殺之引頸待刀乃送歸署銓衣冠向闕拜又遙拜其父母遂自經事聞贈大理卿再贈兵部尚書諡忠烈官其

子道濬錦衣指揮僉事銓父五典歷官南京大理卿時侍養家居詔以銓所贈官加之及卒贈太子太保初五典度海內將亂築所居寶莊爲堡堅甚崇禎四年流賊大至五典已歿道濬及弟官京師獨銓妻霍在衆請避之曰避賊而出家不保出而遇賊身更不保等死耳曷死於家乃率僮僕堅守賊環攻四晝夜卒不克而去其避山谷者多被淫掠副使王肇生名其堡曰夫人城後賊數來犯並擊却之里人多賴以免道濬旣官錦衣以忠臣子見重屢加都指揮僉事僉書衛所爲人兇邪無賴崇禎初楊維垣楊所修賈繼春被斥道濬力頌其賢已受王永光指屢疏攻錢龍錫成基命文震孟毛羽健等卒以納賄居間事敗戍海寧



何廷魁字汝謙山西威遠衛人萬曆二十九年進士授涇縣知縣調寧晉遷刑部主事歷歸德衛輝河南知府西寧副使坐考功法復爲黎平知府會遼事棘遷副使分巡遼陽袁應泰納降廷魁爭不聽及瀋陽破同事者遣孥歸廷魁曰吾不敢爲民望無何

大清兵渡濠廷魁請乘半濟急擊之俄薄城圍未合又請盡銳出禦應泰並不從遼陽破廷魁懷印率其妾高氏金氏投井死婢僕從死者六人都司徐國全聞之亦自經公署事聞贈光祿卿再贈大理卿賜祭葬諡忠愍世廕錦衣百戶國全贈恤如制

高邦佐字以道襄陵人萬曆二十三年進士授壽光知縣教

民墾荒招集流亡三千家歷戶部主事員外郎稍遷永平知府濬灤河築長堤裁抑稅使高淮不敢大橫遷天津兵備副使平巨盜董時耀轉神木參政屢破套寇沙計以嫡母憂歸補薊州道坐調兵忤王者意被劾歸天啟元年遼陽破起參政分守廣寧以母年八十餘涕泣不忍去母責以大義乃行熊廷弼王化貞構隙邦佐知遼事必潰敗累乞歸方報允而化貞棄廣寧逃衆謂邦佐旣請告可入關邦佐叱曰吾一日未去則一日封疆臣也將安之夜作書訣母策騎趨右屯謁廷弼言城中雖亂敵尚未知亟提兵入城斬一二人人心自定公卽不行請授邦佐兵赴難廷弼不納借化貞並走邦佐仰天長歎泣語從者曰經撫俱逃事去矣松山吾守地當死



此汝歸報太夫人遂西向拜闕復拜母解印綬自經官舍僕高永曰主人死安可無從者亦自經於側事聞賜祭葬贈光祿卿再贈太僕卿諡忠節世廕錦衣百戶邦佐與張銓何廷魁皆山西人詔建祠宣武門外顏曰三忠同時顧願以右參政分守遼海道廣寧之變力屈自經贈太僕少卿世廕本衛副千戶

崔儒秀字儼初陝州人萬曆二十六年進士歷官戶部郎中遷開原兵備僉事時開原已失儒秀募壯士攜家辭墓而行經略袁應泰以兵馬甲仗不足恃為憂儒秀曰恃人有必死之心耳應泰深然之遼陽被圍分守東城矢集如雨不少却會兵潰儒秀痛哭戎服北向拜自經事聞賜恤視何廷魁賜

祠曰愍忠以陳輔堯段展配祀輔堯揚州人萬曆中舉於鄉歷官永平同知轉餉出關與自在知州段展同駐瀋陽天啟元年日暈異常展牒應泰言天象示警宜豫防踰月而瀋陽破展死之輔堯方奉命印烙左右以無守土責勸之去輔堯曰孰非封疆臣何去為望闕拜拔刀自剄與展並贈按察僉事輔堯官膠州時有覬山藪者受而懸之公帑中展涇陽人起家舉人

張振德字季修崑山人祖情從祖意皆進士情福建副使意山東副使振德由選貢生授四川興文知縣縣故九絲蠻地萬曆初始建土牆數尺戶不滿千永寧宣撫奢崇明有異志潛結奸人掠賣子女振德捕奸人論配之招還被掠者三百



餘人崇明賄以二千金振德怒却之裂其牘天啟元年方赴成都與鄉閭事而崇明部將樊龍殺巡撫徐可求重慶知府章文炳巴縣知縣段高選皆抗節死賊遂據重慶叛時振德兼署長寧去賊稍遠從者欲走長寧振德曰守與文正也疾趨入城長寧主簿徐大禮與振德善以騎來迎振德却之督鄉兵與戰不敵退集居民城守會大風雨賊毀土城入振德命妻錢及二女人持一劍坐後堂曰若輩死此吾死前堂乃取二印繫肘後北向拜曰臣奉職無狀不能殺賊惟一死明志妻女先伏劍死乃命家人舉火火熾自剄一門死者十二人賊至火所見振德尸面色如生左手繫印右手握刀忿怒如赴敵狀皆駭愕羅拜而去事聞賜祭葬贈光祿卿諡烈愍

勅有司建祠世廕錦衣千戶振德既死與文教諭劉希文代署縣事甫半載賊復薄城誓死不去妻白亦慷慨願同死城破夫婦罵賊並死之大禮守長寧城亦陷大禮曰吾不可負張公一家四人仰藥死贈重慶同知世廕百戶文炳長泰人萬曆四十一年進士除戶部主事歷郎中遷知府治行廉潔吏民愛之賊既殺可求及副使駱日升李繼周等文炳罵賊遂被殺賊後知其賢為覓屍殯而歸之喪出江上夾岸皆大哭贈太僕少卿再贈太常卿世廕外衛副千戶高選雲南劍川縣人萬曆四十七年進士樊龍等變起高選適在演武場立遣吏歸印於署厲聲叱賊賊魁戒其下勿殺而高選罵不絕聲遂遇害父汝元母劉側室徐及一子一女聞變皆自盡



僕冒死覓主尸亦被殺初廕尚寶卿世廕外衛試百戶崇禎元年子暄援振德例叩閭請優恤贈光祿卿世廕錦衣千戶建祠奉祀汝元等亦獲旌十五年高選子復以謚請賜諡恭節時先後殉難者灌縣知縣蒙化左重率壯士追擊賊於成都力戰馬蹶罵賊死南溪知縣王碩輔城陷自盡爲賊支解桐梓知縣洪維翰城陷奪印不屈死典史黃啟鳴亦死郫縣訓導趙愷率衆擊賊被刺死遵義推官馮鳳雛挺身禦賊被創死遵義司獄蘇樸威遠經歷袁一修義不汙賊墜城死大足主簿張志譽典史宋應臯集兵奮戰力屈死所司上其狀贈重碩輔維翰尚寶卿世廕千戶啟鳴重慶通判愷重慶同知俱世廕試百戶崇禎十二年重子廷臯援高選例乞恩命

如其請

董盡倫字明吾合州人萬曆中舉於鄉除清水知縣調安定咸有惠政秩滿安定人詣闕奏留詔加鞏昌同知仍視縣事久之以同知理甘州軍餉解職歸天啟初奢崇明反率衆薄城盡倫偕知州翁登彥固守賊遣使說降盡倫大怒手刃賊使扶其睛啖之屢挫賊鋒城獲全乃率衆援銅梁復有功尋被檄擣重慶孤軍深入伏四起遂戰死贈光祿少卿世廕千戶建祠奉祀尋改廕指揮僉事崇禎初論全城功改廕錦衣千戶其時里居死節之士大夫皆未蒙贈卹爲附於篇李忠臣永寧人官松潘參政家居陷賊募死士密約總兵官楊愈懋令以大兵薄城已爲內應事洩合門遇害高光瀘州人嘗



爲應天通判城陷薙髮爲僧與子在崑募壯士殺賊百餘賊怒追至大葉壩光罵賊不屈與家衆十二人同死胡縝永寧舉人預策崇明必反上書當事當事不爲意後賊起被執嚴刑錮獄中弟緯傾家救免之乃糾義徒潛結賊將張令等執僞相何海若部勒行陣自當一面數有斬馘賊甚畏之旣而爲火藥焚死聶繩昌富順舉人毀家募義勇禦賊戰死吳長齡瀘州監生率衆恢復瀘州尋中伏父子俱戰死胡一夔興文人仕爲龍陽縣丞被執不屈死

龔萬祿貴州人也目不知書有膽志膂力過人從劉綎征楊應龍先登海龍囤上官署爲守備戍建武所奢崇明反衆推萬祿爲遊擊將軍主兵事指揮李世勛名位先萬祿亦受節

制戮力固守崇明謀犯成都憚萬祿牽其後遣部將張令說降令因與萬祿結給崇明以降崇明果遣他賊來戍萬祿脅降之先後誘殺賊無算乃微服走敘州說副使徐如珂曰賊精騎萃成都畱故巢者悉老弱誠假萬祿萬人直搗其巢彼必還兵救成都圍立解矣如珂奇其計而不能用及賊退去尋悉衆來攻萬祿邀擊十里外兵少敗還城遂陷世勛具衣冠再拜率家屬自焚死萬祿手刃兩妾兩孫自刎不殊乃握稍馳出大呼我龔萬祿也孰能追我者賊相視不敢逼走至敘州乞師巡撫朱燮元遂以兵復建武會官軍敗於江門賊四面來攻萬祿力戰三日手刃數十人與子崇學並死詔贈都督僉事立祠賜祭世廕百戶時成都衛指揮翟英扼賊龍



泉驛成都後衛指揮韓應泰赴援成都遇賊草堂寺小河所  
鎮撫郁聯若麀賊城西茂州百戶張羽救援郫縣皆力戰死  
管良相者烏撒衛指揮也為人慷慨負奇節天啟初樊龍等  
反於四川巡撫李標召置麾下與籌軍事良相策安邦必  
反佐標為固守計尋以祖母疾乞假歸泣語標曰烏撒孤城  
密邇水西且與安效良相讐水西有變禍必首及良相無子  
願以死報國乞建長策保此一方標亦泣下逾月邦彥果反  
圍其城良相固守不下久之外援不至城陷自縊死同官李  
應期朱運泰蔣邦俊亦遇害時普定衛王明重威清衛丘述  
堯平壩衛金紹勛壩陽把總簡登龍里故守備劉臯臯子景  
並死邦彥之難而訓導劉三畏賊至不避兀坐齋中見殺人

補龍里三劉

徐朝綱雲南晉寧人萬曆二十八年舉於鄉天啟元年授安  
順推官至即署府事明年安邦彥反來攻朝綱督兵民共守  
土官溫如璋訓導周國光開門迎賊朝綱方出城督戰為賊  
所執脅之降不屈索其印罵曰死賊奴吾頭可斷印不可得  
賊怒刀斧交下而死其妻聞之登樓自縊長子婦急舉火焚  
舍挈十歲女躍入烈燄中死孫應魁年十六持矛潰圍出城  
覓其祖遇賊被殺婢僕從死者十一人五年正月恤殉難諸  
臣贈朝綱光祿少卿廕子入國學子天鳳甫第進士即奔喪  
歸服闋授戶部主事拜疏言臣家一門臣死忠妻死節婦死  
姑孫死祖婢僕死至此從來未有之節烈乞如張振德例再



加優恤臣母臣嫂一體旌表帝深嘉之再贈光祿卿改廕錦  
衣世千戶賜祭葬立祠建坊諸從死者皆附祀國光被獲伏  
誅妻子爲奴其後畢節同知楊以成之子舉人興南廣順知  
州鄭鼎之子舉人崑貞皆援朝綱例請厚卹其父莊烈帝初  
卽位並允行之以成雲南路南人萬曆中由貢生授貴陽通  
判理畢節衛事秩滿進同知仍治畢節天啟二年安邦彥反  
圍貴陽以成具蠟書乞援於雲南巡撫沈儼炳書發而賊已  
至與戰却之無何賊來益衆以成遣吏懷印問道走貴州身  
督吏民拒守會援兵至賊方夜逃而衛吏阮世爵爲內應引  
賊入城城遂陷以成倉皇投繯賊繫之去乃爲書述賊中情  
形寘竹筒中令弟以恭赴雲南告變行至叢納溪賊搜得其

書遂并以成殺之家屬死者十三人五年正月贈按察僉事  
賜葬崇禎初再贈光祿卿世廕錦衣千戶賜祭葬建祠立坊  
以恭亦附祀鼎字爾調龍溪人由鄉舉爲貴州廣順知州策  
安邦彥必反上書當事言狀州故無城督民樹柵實以土無  
何邦彥果反遣兵來攻鼎誓死固守或言賊勢盛宜走定番  
鼎曰吾守土吏也義當與城存亡及賊入與土官金燦端坐  
堂上並爲賊所殺婢僕從死者六人吏目胡士統被執亦不  
屈死巡撫李樞上於朝贈僉事賜祭崇禎元年再贈光祿卿  
世廕錦衣千戶子祭葬有司建祠崑貞後舉進士歷御史尚  
寶卿時有孫克恕者字推之馬平人舉於鄉歷官貴州副使  
分巡思石道安邦彥之亂戰死有虎守其骸不去蠻人嗟異



事聞贈太僕卿賜祭葬而嘉興人王昌胤爲貴陽同知分理永寧衛事天啟元年奢崇明父子據永寧反昌胤被難贈僉事賜祭莊烈帝踐阼其子監生世駿言賊踞永寧臣父刺血草三揭繳印上官以次年五月再拜自縊賊恨之焚其屍二孫一孫女及僕婢十三人同日被害乞如張振德徐朝綱例優加恤典報可

姬文胤字士昌華州人舉於鄉久之不第天啟二年授滕縣知縣視事甫三日白蓮賊徐鴻儒薄城民十九從亂文胤徒步叫號驅吏卒登陴不滿三百見賊輒走存者纔數十問民何故從賊曰禍由董二董二者故延綏巡撫董國光子也居鄉貪暴民以故從賊文胤急憑城曉告曰良民以董二故挺

而走險吾執二寘諸法爲若雪憤可乎文胤長身赤面鬚髯戟張賊望見駭爲神人皆謹呼羅拜俄而箭發西隅斃二賊視之延綏沙柳箬也賊謂文胤給之大憤肉薄登城衆悉潰文胤紆衣坐堂皇嚼齒罵賊賊前搏裂其冠裳械繫之罵不屈三日解印畀小吏魏顯照及家僮李守務北向拜闕遂自經賊榜掠顯照索印顯照潛授其父而與守務罵賊並死之事聞贈太僕少卿立祠致祀錄一子優恤顯照守務家董二踰城遁去時賊陷鄒縣博士孟承光被執詬詈不屈死贈尚寶少卿世廕錦衣千戶承光字永觀亞聖裔世廕五經博士也

鄭國昌邠州人萬曆三十五年進士歷官山西參政崇禎元



年以按察使治兵永平遷山西右布政使上官奏留之三年正月

大清兵自京師東行先使人伏文廟承塵上王者不覺也初四日黎明登城有守將左右之國昌覺其異捶之至死須臾北樓火發城遂破國昌自縊於城上中軍守備程應琦從之應琦妻奔告國昌妻與之偕死知府張鳳奇推官盧成功盧龍教諭趙允殖副總兵焦延慶東勝衛指揮張國翰及里居中書舍人廖汝欽等皆死之後諸生韓洞原周祚新馮維京胡起鳴胡光奎田種玉等十數人皆死國昌鳳奇一門盡死事聞贈國昌太常卿鳳奇光祿卿並賜祭葬廕一子成功等贈恤有差鳳奇陽曲人起家鄉舉

黨還醇字子貞二原人天啟五年進士授休寧知縣有善政以父憂歸崇禎二年服闋起官良鄉十二月

大清兵薄城督吏民乘城拒守或言縣小無兵盍避去還醇毅然曰吾守土吏也去將安之救兵不至力屈城破與典史史之棟教諭安上達訓導李廷表驛丞楊其禮並死焉事定父老覓還醇屍得之草間赤身面縛體被數鎗羣哭而殮之上達貴州安順人萬曆末年舉於鄉謁選得教諭至是闔門死難事聞贈還醇光祿丞子祭葬有司建祠官其一子之棟等亦贈卹給驛歸其喪已而吏科上言還醇城亡與亡之死靡貳猶曰有守土責也之棟上達等冗賤下吏倘抱頭鼠竄何地不可容身乃致命遂志有死無隕卽破格褒崇誰曰不



可朝廷必不惜今日之虛名作將來之忠義乃僅贈良鄉主簿國學教職於聖主優恤之典謂何帝感其言下部更議乃贈上達五經博士與其禮等及千戶蕭如龍何秉忠百戶李廕並配祀還醇祠武舉人陳蠡測諸生梅友松等十五人烈婦朱氏等十七人並建坊旌表無何順天府尹劉宗周以上達得死難之正請贈翰苑官坊以爲世勸不報當是時列城被兵多失守其以死事聞者更有香河知縣任光裕灤州知州楊燦光裕贈卹如還醇燦贈光祿少卿並任一子

李獻明字思皇壽光人崇禎元年進士授保定推官明年十一月

大清兵臨遵化巡撫王元雅與推官何天球遵化知縣徐澤

及先任知縣武起潛等憑城拒守時獻明以察核官庫在城中或謂此邑非君所轄去無罪獻明正色曰莫非王土安敢見危避難請守東門未幾城破遂死之元雅太原人爲巡撫數月卽遇變自縊而死天球以永平推官理遵化軍餉澤字兌若襄陽人獻明同年進士蒞任甫七日與天球起潛並殉難起潛字用潛進賢人天啟五年進士初爲武清知縣有諸生爲人所訐納金酒甕以獻起潛召學官及諸生貧者數人置甕庭中謂之曰美酒不可獨享與諸君共之酒盡金見其人惶恐請罪卽以金分畀貧者治縣一年有聲調繁遵化坐事被劾解官候代遂及於難三年正月巡撫方大任論畿輔諸臣功罪因言元雅有失城罪而一死節概凜然足以蓋愆



其秋樞輔孫承宗請卹殉難諸臣亦首元雅帝贈獻明天球  
光祿少卿澤光祿丞俱廢一子元雅以大吏失城贈卹不及  
張春字泰宇同州人萬曆二十八年舉於鄉歷刑部主事勵  
操行善談兵天啟二年遼東西盡失廷議方急邊才十月超  
擢春山東僉事永平燕建二路兵備道時大軍屯山海關永  
平爲孔道士馬絡繹關外難民又雲集春應之有方事皆就  
理而民不告病累轉參議副使參政仍故官七年二月哈刺  
慎部長汪燒餅者擁衆窺桃林口春督守將擒其三人燒餅  
叩關愿受罰春等責數之誓不敢叛立盟去春以功進服俸  
一等崇禎元年改春關內道兵部尚書王在晉惑浮言劾春  
嗜殺一日梟斬十二人春具揭辯關內民亦爲訟冤在晉復

劾其通奄尅餉遂削籍下法司治督師袁崇煥言春廉惠不  
聽御史李炳言春疾惡過甚爲人中傷夫殺之濫與否一勘  
卽明乞免提問亦不從明年法司言春被劾無實帝卽命釋  
之三年正月永平失守鄭國昌被難起春永平兵備參議代  
之春言永平統五縣一州今郡城及灤州遷安並失所餘昌  
黎樂亭撫寧又關內道所轄臣寄跡無所當駐何城臣以兵  
備名官而實無一兵操空拳入虎穴安能濟事乞於赴援大  
將中勅一人與臣同事臣亦招舊日義勇率之自效臣身已  
許此城不敢少規避但必求實濟封疆此臣區區之忠所以  
報聖明而盡臣職也因言兵事不可預洩乞賜陛見面陳方  
略帝許之旣入對帝數稱善進春參政已而偕諸將收復永



平諸城論功加太僕少卿仍涖兵備事候巡撫缺推用時乙榜起家若孫元化劉可訓丘禾嘉劉應遇同時並授節鉞而春獨需後命以無援於朝也永平當兵燹之餘閭閻困敝春盡心撫卹人益懷之四年八月

大清兵圍大凌河新城命春監總兵吳襄宋偉軍馳救九月二十四日渡小凌河越三日次長山距大凌城十五里大清以二萬騎逆戰兩軍交鋒火器競發聲震天地春營被衝諸軍遂敗襄先走春復收潰衆立營時風起黑雲見春命縱火風順火甚熾天忽雨反風士卒焚死甚衆少頃雨霽兩軍復鏖戰偉力不支亦走春及參將張洪謨楊華徵遊擊薛大湖等三十三人俱被執部卒死者無筭諸人見我

太宗文皇帝皆行臣禮春獨植立不跪至晚遣使賜以珍饌春曰忠臣不事二君禮也我若貪生亦安用我遂不食越三日復以酒饌賜之春仍不食守者懇勸乃感

太宗文皇帝恩始一食令薙髮不從居古廟服故衣冠迄不失臣節而死初襄等敗書聞以春守志不屈遙遷右副都御史恤其家其妻翟聞之慟哭六日不食自縊死其後我大清有議和意春爲言之於朝朝中譁然詆春誠意伯劉孔昭遂劾春降敵不忠乞削其所授憲職朝議雖不從而有司遂繫其二子竟死於獄







何天衢

朱萬年黎平人萬曆中舉於鄉歷官萊州知府有惠政崇禎五年叛將李九成等陷登州率眾來犯萬年率吏民固守時山東巡撫徐從治登萊巡撫謝璉並在城中被圍堅守數月從治中砲死賊詭乞降璉率萬年往受為所執萬年曰爾執我無益可以精騎從我呼守者出降賊果精騎五百擁萬年至城下萬年大呼曰我被擒誓必死賊精銳盡在此急發砲擊之母以我為念守將楊御蒼不怒萬年復頓足大呼賊怒殺之城上人見萬年已死遂發砲賊死過半事聞贈太常卿賜祭葬有司建祠官其一子初賊掠新城知縣秦三輔訓導王協中禦之竝死其陷黃縣知縣吳世揚罵賊死縣丞張國

輔參將張奇功守備熊奮渭皆力戰死陷平度知州陳所聞自縊死三輔世揚贈光祿少卿所聞贈太僕少卿竝賜祭葬建祠廕子協中國輔奇功奮渭亦贈恤有差三輔三原人世揚洛陽人所聞畿輔人竝起家乙榜

張瑤蓬萊人天啓五年進士授開封府推官絕請寄抑豪強吏民畏如神崇禎四年行取入都吏科宋鳴梧力援宋致為給事而抑瑤僅得府同知瑤大怒疏摭攻行賄狀吏部尚書閔洪學等亦劾瑤饋遺奔競鳴梧復極論之遂謫河州判官未赴旋里明年正月李九成等逼登州瑤率家眾登陴拒守城陷瑤猶揮石奮擊賊擁執之大罵不屈被殺妻女四人竝投井死贈光祿少卿先是賊陷新城舉人王與夔張儼然死



之其陷他縣者貢生張聯台蔣時行亦死之皆格於例不獲旌禮部侍郎陳子壯上言舉貢死難無恤典舊制也然名旣登於天府恩獨後於流官九泉之下能無怨恫比者武舉人李調禦賊捐軀已蒙贈恤武途如此文儒安得獨遺乞量贈一官永爲定制可之乃贈與夔儼然宛平知縣聯台時行順天府教授其後地方死難若舉人李讓吳之秀賈煜張慶雲貢生張茂貞張茂恂皆贈官如前制

張光奎澤州人仕至山東右參政崇禎五年流賊躡山西監司王肇生知歙人吳開先勇略便宜署爲將使擊賊戰澤州城西賊敗去從沁水轉掠陽城開先恃勇渡沁戰北留墩下擊斬數百人砲盡無一軍盡沒賊乃再犯澤州光奎方里

居與兄守備光璽千總劉自安等率衆固守八日援兵不至城陷竝死之澤大州也遠近爲震動事聞贈光祿卿光璽等贈恤有差是歲紫金梁等寇遼州里居行人楊于楷與主事張友程佐知州信陽李呈章拒守力屈城陷于楷被執罵賊死呈章友程及舉人趙一亨侯標竝死之明年六月賊陷和順里居昌平副使樂濟衆被傷不屈投井死贈于楷光祿少卿濟衆太僕少卿有徐明揚者浮梁人由選貢生爲平順知縣六年四月賊來犯或以城小無備乞避之郡城明揚不可設策守禦城破不屈死

李中正盧氏人萬曆末舉會試以天啓二年赴廷對授承天府推官遷兵部主事崇禎初謝病歸六年羣盜大亂河北其



冬乘冰渡河遂由澠池犯盧氏中州承平久不設備驟聞賊至吏民皇駭知縣金會嘉棄城遁十二月初賊入城中正勒家衆及里中壯士奮擊賊衆寡不敵力戰死賊縱掠城中執舉人靳謙吉使跪不屈大罵而死賊以是冬始入河南自是屢陷名城殺將吏無算鄉官舉貢多被難其宜陽馬足輕靈寶許輝新安劉君培馬山李登英偃師裴君合陝州張我正張我德孟津孫挺生嵩縣傅世濟李佩玉上蔡劉時寵輩則先後以布衣抗節顯足輕性孝友弟惑婦言迫分產乃取田礲薄者自予萬曆末歲大凶出粟六百石以賑焚券千餘崇禎六年冬流賊渡河而南挈家避之石龍崖三女皆殊色慮賊污悉投崖死足輕被執厲聲大罵賊怒并其三子殺之其

家衆皆遇害惟存次子駿一人後登鄉薦輝爲縣中陰陽官是冬爲賊所掠大罵見殺君培有義行攜子及從孫避難道遇賊欲殺其孫君培曰我尚有男此子乃遺孤幸舍之而殺我賊如其言二子獲免山性剛直土寇于大中陷新安獲山使負米叱曰我良民肯爲賊負米邪大罵而死登英遇城破慷慨就義君合幼孤母苦節育之孝養惟謹賊至聚衆保沙岸寨攻圍十晝夜不克說之降大罵不從寨破被礮我正素豪俠集衆保鄉里一方賴之十四年勒衆禦賊馘三人俄賊大至衆悉奔奮臂獨戰賊愛其勇欲生致之詬罵自刎死我德知賊至恐妻子受辱驅一家二十七人登樓自焚挺生初讀書試有司不利去學星術預卜十五年有寇禍編茅河渚



以居賊蹤跡得之語其妻梁氏曰此匹夫徇義之秋也夫婦對泣詬賊而死世濟與兄世舟竝為主寇于大中所執將殺之兄弟相抱泣賊議釋其一世濟卽奪賊刀自殺世舟獲免佩玉者御史興元孫也崇禎末中州盡殘佩玉結遺民捍鄉井與鄰寨相犄角往往尾賊後奪其輜重賊憚之不敢出其境後大舉圍別寨佩玉往救力戰而死里人聚哭之時寵有孝行賊陷城其父宗祀以年老不能行命之速避遂自殺時寵慟哭刺殺一子三女夫婦竝自剄其妹適歸寧亦從死一家死者八人

方國儒字道醇歙縣人四歲失父奉母以孝聞天啓元年舉於鄉崇禎間授保康知縣流賊大入湖廣將吏率望風先奔保康小邑素無兵七年正月賊至國儒急率鄉兵出禦力不支敗走城遂陷亾何賊退國儒還入城踰月復至督吏民固拒賊至益衆復陷國儒冠服坐堂上被執大罵身中七刀死是年正月賊陷竹溪執知縣余霄將殺之子諸生伯麟請代乃免賊退數日復陷其城訓導王紹正遇害穀城舉人常存畏會試赴京道遇賊欲劫爲首領罵不絕口死他賊犯興山知縣劉定國堅守城將陷遣吏懷印送上官罵賊死何承光貴州鎮遠人萬曆四十年舉於鄉崇禎中歷官夔州同知七年二月賊由荊州入夔門遂犯夔州城中倉猝無備副使周士登在涪州通判黃尚儀推官劉應候奉節知縣談楚良悉遁承光攝府事督吏民城守力竭無援城遂陷承光



整冠帶危坐賊入殺之投屍於江自賊起陝西轉寇山西畿輔河南北及湖廣四川摧陷州縣數十未有破大郡者至是天下爲震動承光贈夔州知府賊他部自漢中犯大寧知縣高日臨見勢弱不能守齧指書牒乞援上官率衆禦之北門兵敗被執脇降大罵不屈賊碎其體而焚之訓導高錫及妻女巡檢陳國俊及妻皆遇害日臨字儼若鄱陽恩貢生賊旣陷夔州他賊卽以次日陷巫山通江巡檢郭纘化陣歿通江指揮王永年力戰死之至四月守備郭震辰指揮田實擊賊百丈關兵敗被執罵賊死

龐瑜字堅白公安人家貧躬耕自給夏轉水灌田執書從牛後朗誦不輟由歲貢生授京山訓導崇禎七年擢陝西崇信知縣縣無城兵荒貧民止百餘戶瑜知賊必至言於監司陸夢龍以無兵辭瑜集士民流涕誓死職閏八月天大雨土垣盡圯賊掩至瑜急解印遣家人齎送上官端坐堂皇以待賊至粹令跪瑜罵曰賊奴敢辱官長拔刀擬之罵益厲賊掠城中無所有執至野外剖心裂屍而去贈固原知州時賊盡趨秦中長吏多殉城者董三謨黎平人舉於鄉爲山陽知縣賊粹至陷其城三謨及父嗣成弟三元俱死之妻李氏亦攜子女偕死贈光祿丞立祠與嗣成三元並祀妻女建坊旌表吉永祚輝縣人爲鳳陽主簿謝事將歸會賊至知縣棄城遁永祚倡義拒守城陷北面再拜曰臣雖小吏嘗食祿於朝不敢以謝事逃責大罵而死子士樞士模皆死教諭李之蔚鄉官



魏炳亦不屈死永祚贈漢中衛經歷餘贈恤有差婁琇知涇州閏八月城陷死贈太僕少卿蒲來舉知甘泉賊來犯守備孫守法等擁兵不救城破來舉手刃一賊傷六賊而後死贈光祿少卿呂鳴世福建人由恩貢生為麟游知縣地遭兵燹拊居民有恩賊陷其城未忍害鳴世絕食六日卒有宋緒湯者耀州諸生賊攻城被獲大罵死尹夢鰲雲南太和人萬曆時舉於鄉崇禎中為潁州知州八年正月方謁上官於鳳陽聞流賊大至立馳還賊已抵城下乃偕通判趙士寬率吏民固守城北有高樓矚城中諸生劉廷傳請先據之夢鰲以為然而廷傳所統皆市人不可用賊遂據樓以攻且鑿城頽數丈城

不顧夢鰲乃持大刀獨當城頽壞處殺賊十餘人身被數刃賊眾畢登遂投城下烏龍潭死弟姪七人皆死之廷傳者故布政使九光從子任俠好義亦罵賊死九光子廷石分守西城中賊刃未絕口授友人方略令繕牘上當事旋卒士寬字汝良掖縣人由門廕為鳳陽通判駐潁州以正旦詣郡城聞警一日夜馳三百里返州城陷率家眾巷戰力竭亦投烏龍潭死妻李攜三女登樓自焚僕王丹亦罵賊死鄉官尚書張鶴鳴弟副使鶴勝子大同中書舍人田之穎知縣劉道遠光祿署丞李生白訓導丁嘉遇舉人白精忠郭三杰諸生韓光祖等皆死之光祖進士獻策父也被執賊脅使跪叱曰吾生平讀書止知忠義遂大罵賊殺之碎其屍妻武偕一妹一女



竝獻策妻李赴井死妾李方有娠賊剖腹剔胎死次子定策  
孫日曦罵賊死獨獻策獲存有檀之槐者護母柩不去與賊  
格鬪殺數人被磔死時被難者共一百三人城中婦人死節  
者二十七人烈女八人潁州忠烈稱獨盛云潁有衛隸河南  
指揮李從師王廷俊千戶孫升田三震百戶羅元慶田得民  
王之麟俱乘城戰死賊既陷潁州屠其民其別部卽以是月  
由壽州犯鳳陽鳳陽故無城中都留守朱國相率指揮袁瑞  
徵呂承廕郭希聖張鵬翼周時望李郁岳光祚千戶陳弘祖  
陳其忠金龍化等以兵三千逆賊上窰山頗有斬獲俄賊數  
萬至矢集如蝟遂敗國相自刎死餘皆陣歿賊遂犯皇陵大  
肆焚掠知府顏容暄囚服匿於獄釋囚獲之容暄大罵賊杖

殺之血浸石堦宛如其像滌之不滅士民乃取石立塚建祠  
奉祀推官萬文英臥病賊索之子元亨年十六泣語父曰兒  
不得復事親矣出門呼曰若索官何爲我卽官也賊繫之顧  
見其師萬師尹亦被繫給賊曰若欲得者官爾何繫此賤隸  
賊遂釋之元亨乃極口大罵賊怒斷脛死文英獲免容暄漳  
浦人文英南昌人皆進士一時同死者千戶陳永齡百戶盛  
可學等四十一人諸生六十六人舉人蔣思宸聞變投繯死  
後給事中林正亨錄上其狀贈夢鰲光祿少卿士寬光祿丞  
餘贈恤有差

盧謙字吉甫廬江人萬曆三十二年進士授永豐知縣擢御  
史出爲江西右參政引疾歸崇禎八年二月流賊犯廬江士



民具財帛求免賊僞許之俄襲陷其城謙服命服危坐中門賊至欲屈之罵曰吾朝廷憲臣肯爲賊屈邪鼠輩滅亾在卽安敢無禮賊怒殺之投屍於池池水盡赤舉人張受畢尹周亦不屈被殺是年正月賊陷霍丘縣丞張有俊教諭倪可大訓導何炳鄉官田旣庭戴廷對舉人王毓貞死焉賊陷巢縣知縣嚴寬被執不屈一門皆死二月犯太湖知縣金應元據城東大濠以守奸人導賊渡濠執應元斫之未殊自經死訓導扈永寧亦死焉謙贈光祿卿餘贈恤如制寬歸安人應元浙江山陰人皆舉人

龔元祥字子禎長洲人舉於鄉崇禎四年爲霍山教諭厲廉隅以名教自任與訓導姚允恭友善八年戊寅八月元祥急偕縣令爲守禦備賊掩至令卽逸去元祥督士民固守戒勸之避元祥慨然曰食祿而違其難不忠臨危而棄其城不義吾平日講說者謂何倘不測死爾及賊陷城元祥整衣冠危坐賊至侃侃論以大義賊欲屈之厲聲曰死卽死賊輩何敢辱我賊怒執之去罵不絕口遂遇害子炳衡號呼罵賊賊又殺之閱五日允恭斂其屍卽自縊適令至解免越日賊復入允恭卒死之事聞贈元祥國子助教建祠曰忠孝以其子配允恭亦被旌

王信陝西寧州人父歿廬墓三年母歿信年已六十足不踰闕者亦三年崇禎初由歲貢生除靈璧訓導遷真陽知縣八年二月出撫土寇會流賊猝至被執使諭降羅山真陽信大



罵不從斷頭剖腹而死閱四日其子來覓猶舒指握子手贈  
光祿丞建祠奉祀

史記言字司直當塗人崇禎中舉人由長沙知縣遷知陝州  
陝當賊衝記言出私財募士聘少室僧訓練之斬賊數十級  
生擒二十餘人老回回憤率數萬人攻城不得志去乘雪夜  
來襲而所練土方調他郡城遂陷記言縱火自焚兩僧掖之  
出曰死此何以自明乃越女牆下賊追獲之令降叱曰有死  
知州無降知州也遂被殺指揮李君賜殺數賊而死訓導王  
誠心里居教諭張敏行姚良弼指揮楊道泰阮我疆鎮撫陳  
三元亦不屈死是月賊陷盧氏知縣白楹自剄十年九月陷  
澠池知縣李邁林死焉記言贈光祿少卿餘贈恤有差

梁志仁南京人保定侯銘之裔也萬曆末年舉於鄉崇禎六  
年授衡陽知縣調羅田賊大擾湖廣志仁日夕儆備羅汝才  
謂左右曰羅田城小易克然梁君長者吾不忍加兵俟其去  
當取之會邑豪江猶龍與賊通志仁捕下獄猶龍知必死潛  
導汝才別校八年二月猝攻城志仁急偕典史單思仁教諭  
吳鳳來訓導盧大受督士民守禦已而城陷志仁持長矛巷  
戰殺六賊力屈被繫抑使跪罵曰我天子命官肯屈膝賊輩  
邪賊怒碎其支體而焚之妻唐被逼亦大罵曰汝殺我夫我  
亦當殺汝奪刀不得以口齧賊手遂遇害思仁等亦不屈死  
汝才在英山聞之馳至羅田斬其別校曰奈何擅害長者以  
錦繡斂其夫婦屍鳳來福建人由鄉舉大受寶慶人由貢生



明年贈志仁蘄州知州思仁羅田主簿鳳來國子助教大受  
學錄廕子祭葬有差

王國訓字振之解州人天啓二年進士歷知金鄉壽張滋陽  
武清崇禎四年坐大計久之補調扶風國訓性剛嚴恥干進  
故官久不遷八年秋賊來犯偕王簿夏建忠典史陳紹南教  
諭張弘綱訓導陳縉嬰城固守閱兩月外援不至城陷罵賊  
死建忠等亦不屈死贈國訓光祿少卿建忠等皆贈恤當是  
時大帥曹文詔艾萬年等竝戰歿賊勢益張關中諸州縣悉  
殘破八月賊陷永壽殺知縣薄匡宇尋陷咸陽殺知縣趙躋  
昌其時長吏以死聞者隴州知州胡爾純延長知縣萬代芳  
爾純山東人賊數萬來攻悉力守禦賊入自經死代芳與教

諭譚恩驛丞羅文魁協力城守城陷皆死之妻劉妾梁從死  
爾純贈光祿少卿代芳光祿丞妻妾建坊旌表恩等亦賜祭  
有孫仲嗣者膚施人由貢生爲階州學正當事知其才委以  
城守賊大至盡瘁死守城破與妻子十餘人竝死之贈國子  
博士又有楊呈秀華陰人由進士歷官順慶知府大計罷歸  
賊攻城佐有司力禦以死贈恤如制

馬如蛟字騰仲和州人天啓二年進士授浙江山陰知縣清  
操矚然崇禎元年徵授御史劾罷魏黨徐紹吉張訥有直聲  
出按四川安邦彥奢崇明爲四川將士所馘而貴州軍與爭  
功如蛟劾巡按蘇琰冒功罪蜀中奸民率以他人田產投勢  
家如蛟列上十事永革其弊還朝監武會試武舉人董姓者



以技勇聞於帝及入試文不中程被黜帝怒黜考官如蛟亦下吏落職八年論平邦彥功復故官以父憂未赴十二月流賊犯和州如蛟傾貲募士與知州黎弘業登陴固守麾壯士出擊兩戰皆捷賊將奔會風雪大作不辨人色守者皆潰賊遂入城如蛟曰事急矣可坐而待斃乎急下令能擊賊者予百金須臾得百餘人巷戰賊多傷已而力屈遂戰死兄鹽運司判官如蚪諸生如虹及家屬十四人皆死事聞贈太僕少卿官其一子弘業字孟擴順德人由舉人授和州知州賊初至禦卻之其冬復至城將陷弘業繫印於肘跪告其母曰兒不肖貪微官以累母奈何母李泣諭曰汝勿以我為意事至此有死而已遂自縊妻楊妾李及女四人繼之弘業北面慟

哭再拜自刎未殊濡頸血大書曰為臣盡忠為子盡孝大丈夫何惜一死哉俄賊入傷數刃而死贈太僕少卿任一子判官錢大用偕妻妾子婦俱死吏目景一高被創死學正康正諫祁門人起家舉人偕妻汪子婦章赴水死贈國子監丞訓導趙世選亦不屈死贈國子學錄

張紹登字振夫南城人崇禎中由舉人為應城知縣九年賊來犯偕訓導張國勛鄉官饒可久悉力禦却之國勛曰賊不一創城未易守率壯士出擊力戰一日夜頗有斬獲賊乃去邑侍郎王城之子權結怨於族黨怨家潛導賊復來攻或言國勛無守土責盍避之國勛不可佐紹登力守而乞援於上官副將鄧祖禹來救守西南國勛守東北紹登往來策應會



賊射書索權懼斬北關以出賊乘間登南城紹登還署端坐堂上賊至奮拳擊之羣賊大至乃被殺賊渠歎其忠以冠帶覆屍埋堂側國勛黃陂歲貢生賊既入朝服北面拜走捧先聖神王拱立以待賊遂焚文廟投國勛烈燄中祖禹亦不屈死可久幼孤事母孝舉於鄉爲大興知縣崇禎初疏請更三朝要典時奄宦猶擅權謫光祿典簿遷應天府推官刑部主事歷知府丁艱歸賊入語妻程氏曰臣死忠婦死節分也於是妻與女相對自經可久被執賊使之拜曰頭可斷膝不可屈也遂遇害城爲賊支解事聞贈紹登尚寶少卿國勛國子學正

王燾字濬仲崑山人少孤貧九歲爲人後族人有謀其產者

燾舉以讓之獨迎養嗣祖母及母惟謹萬曆末舉於鄉授海門教諭補儀真擢解州知州崇禎九年補隨州州經羣盜焚掠戶不滿千燾訓民兵繕守具土寇李良喬爲亂殲滅之明年正月大賊奄至燾且守且戰擊斬三百餘人賊攻益力相持二十餘日天大風雪守者多散燾知事敗入署整冠帶自經賊焚其署火獨不及燾死所屍植立不仆賊望見駭走已覓州印得之燾所立尺土下事聞贈太常少卿福王時賜諡烈愍建雙忠祠與同邑蔡懋德並祀有魏時光者南昌人善舞雙刀崇禎九年夏爲廣濟典史邑遭殘破長吏設排兵三百人委之教練其冬賊據蘄州河口憚時光不敢渡時光募死士夜襲其營手殺數賊賊不敢逼俄賊大至部卒皆散時



光軍騎據高坡又殺數人賊環繞之勒斷被執不屈死其兄  
陳於上官却不奏兄憤發病死友人收殮之哭盡哀曰弟爲  
國死兄爲弟死吾獨不能表暴之乎具贖力陳乃奏聞贈廣  
濟王簿予恤典

蔣佳徵灌陽人天啓四年舉於鄉崇禎中爲盱眙知縣治甚  
有聲縣故無城佳徵知賊必至訓民爲兵十年秋賊果來犯  
或勸出避持不可設伏要害而親率兵往誘賊殲甚衆賊怒  
環攻之力戰而死其母聞之亦投繯死兵部尚書楊嗣昌上  
言佳徵身自爲將與守備高養正分營禦賊衆寡勢懸身隕  
疆場請贈奉訓大夫尚寶少卿錫之恤典制曰可未幾巡按  
御史言佳徵爲國捐軀子忠母義宜賜諡廕以植倫常乃建

表忠祠并母奉祀同時江北死難者又有吳暢春王寅暢春  
漢陽人崇禎八年爲潛山天堂寨巡檢練鄉兵防賊明年冬  
賊至夜設燎大驚去之踰年賊再至暢春死守力屈仰天歎  
曰吾得死所矣手刃數賊被執不屈死贈迪功郎安慶府經  
歷廕子所鎮撫寅錢塘人膂力絕人舉武鄉試以父征播功  
爲千戶崇禎中擢撫標守備見部卒脆弱詫曰曩賊將軍練  
浙兵聞天下今若爾邪督教之卒始可用十年遷龍江都司  
未上調赴泗州護祖陵賊來犯寅曰賊衆我寡及其未集可  
破也捲甲疾趨至盱眙斬其先鋒一人戰自午迄申賊來益  
衆與守備陳正亨陷陣死贈鎮國將軍都指揮僉事正亨贈  
昭勇將軍指揮使竝官一子



徐尚卿南平人舉於鄉爲劔州知州崇禎十年十月李自成惠登相等以數十萬衆入四川大將侯良柱敗歿於廣元遂攻陷昭化知縣王時化死之尚卿知賊必至集士民泣曰城必不能守若輩速去吾死此衆泣請偕去尚卿不可閱二日城陷投繯死賊遂長驅陷江油彰明安縣羅江德陽漢州吏民皆先遁尋掠郫縣王簿張應奇死之陷金堂典史潘夢科死之是月也賊陷州縣三十六死事者四人事定贈尚卿右參議時化光祿丞應奇按察司知事夢科將仕郎并賜卹典時化湖廣人舉鄉試第一

阮之鈿字實甫桐城諸生也崇禎中下詔保舉人才同邑論德劉若宰以之鈿應授穀城知縣十一年正月之鈿未至張

獻忠襲陷其城據以求撫總理熊文燦許之處其衆數萬於四郊居民洶洶欲竄之鈿至盡心調劑民稍安乃上疏言微臣辦賊有心受事無地獻忠虎踞邑城其謀叵測所要求之地實兵餉取道咽喉秦蜀交會脈絡今已皆爲所據而奸民甘心效用善良悉爲迫脅臣守土牧民之官至無土可守無民可牧庫藏殫虛民產被奪無賦可徵名雖縣令實贅員爾聞今廟堂之上專主撫議臣愚妄謂撫勦二策可合言未可分言致損國威而挫士氣也時不能用賊衆始稍相安後漸出野外行劫之鈿執之以告其營將初少寘之法已而往告皆不應曰官司不給餉爾得餉自止由是村民徙亾殆盡遂掠及闌闐稍拒輒挺刃相向日有死者一城大囂監軍僉事



張大經奉文燦令來鎮撫亦不能禁明年獻忠反形漸萌之  
鈿往說之曰將軍始所爲甚悖今幸得爲王臣當從軍立功  
垂名竹帛且不見劉將軍國能乎天子手詔進官厚資金帛  
此亦誠效也將軍若疑中朝有異論者之鈿請以百口保於  
朝何嫌何疑而復懷他志哉獻忠素銜之鈿遂惡言極罵之  
之鈿憂憤成疾題數語於壁自誓以死遂不視事至五月獻  
忠果反劫庫縱囚毀其城之鈿仰藥未絕獻忠遣使索印堅  
不予賊遂殺之旋縱火焚公署骸骨爲燼而大經爲賊劫去  
不能死迨瑪瑙山戰敗偕賊將曹威等出降士論醜之之鈿  
後贈尚寶少卿

郝景春字和滿江都人舉於鄉署鹽城教諭坐事罷歸起陝  
西苑馬寺萬安監錄事量移黃州照磨攝黃安縣事甫三日  
羣賊掩至堅守八日夜始解去崇禎十一年擢房縣知縣羅  
汝才率九營之衆請降於熊文燦文燦受之汝才猶豫景春  
單騎入其營偕汝才及其黨白貴黑雲祥歃血盟汝才乃詣  
軍門降分諸營於竹谿保康上津而白與貴雲祥居房縣之  
野當是時鄖陽諸屬邑城郭爲墟獨房賴景春拊循粗堪自  
守及大衆雜處居民日惴惴景春乃與王簿朱邦聞守備楊  
道選內修守具外輯諸營明年五月張獻忠反穀城約汝才  
景春子諸生鳴鸞力敵萬夫謂父曰吾城當賊衝而羸  
卒止二百城何以守乃探甲詣汝才曰若不念香火盟乎慎  
毋從亂汝才佯諾鳴鸞覺其僞歸與道選授兵登陴而獻忠



所遣前鋒已至擊斬其將上天龍遣使縋城乞援於文燦凡十四往不報已而獻忠騎大至守者見獻忠兵白幟汝才兵赤幟俄二幟相雜環城力攻貴雲祥策馬呼曰以城讓我保無他也獻忠又以張大經檄諭降景春怒大罵碎之鳴鸞且守且戰閱五日賊多死乃負板穴城城將崩鳴鸞熱油灌之又擊傷獻忠左足殺其所愛善馬乃用間入賊壘陰識獻忠所臥帳將襲擒之指揮張三錫啓北門揖汝才入道選巷戰死大經使汝才說景春降怒不答汝才問庫藏儲蓄安在叱曰庫藏若有物城豈爲汝陷賊怒殺一典史一守備恐之卒不屈與鳴鸞俱被殺僕陳宜亦死之邦聞及其家人竝不屈死事聞贈景春尚寶少卿建祠奉祀道選等亦贈卹已帝召

見輔臣賀逢聖備述其死事狀改贈太僕少卿三錫後爲官軍所獲磔死

何天衢字升宇阿迷州人有勇略土酋普名聲招爲頭目使駐三鄉崇禎三年名聲反謀出三路兵至昆明會戰令天衢自維摩羅平入以砲手三百人助之天衢慨然曰此大丈夫報國之秋也吾豈爲逆賊用哉坑殺砲手數十人率衆歸附署維摩州同知李嗣泌開城納之名聲已陷彌勒聞大懼急撤兩路兵歸巡撫王伉上其事授爲守備後數與嗣泌進勦有功及名聲死妻萬氏代領其衆屢攻天衢天衢屢挫之錄功進參將十三年擢副總兵萬氏贅沙定洲爲壻益以南安兵且厚賄黔國公用事者令毀天衢天衢請兵餉皆不應賊



悉力攻之食盡舉家自焚死時有楊于陞者劔州人舉於鄉  
歷官武定府同知名聲之亂巡撫佗令監紀軍事兵敗被執  
死之贈太僕少卿建祠曰精忠

明史藁

列傳第一百六十七終

明史藁

列傳第一百六十八

光祿大夫 經筵講官明史總裁戶部尚書加七級臣王鴻緒奉

敕編撰

忠義四

閻生斗

王肇坤

劉廷訓

喬若雯

張秉文

趙輝

顏肩紹

吉孔嘉

傅梅

邢國璽

張振秀

鄧藩錫

范淑泰

張焜芳

閻生斗字文瀾汾西人崇禎中由歲貢生歷保安知州七年

七月




大清兵驟臨城生斗集吏民固守城破被執死之判官李師聖吏目王本立訓導張文魁亦同死八月

大兵攻靈丘知縣蔣秉采亟募兵死守力屈眾潰投繯死合門殉之守備于世奇把總陳彥武馬如豸典史張標教諭路登甫竝鬪死事聞贈生斗太僕少卿秉采等贈恤如制秉采字衷白全州舉人

王肇坤字亦資蘭谿人崇禎四年進士除刑部主事以平恕稱未幾改御史流賊破鳳陽疏言兵驕將悍之弊請假督撫重權大將犯軍令者便宜行戮得旨申飭而已俄陳崇政體宥註誤廣薦舉恤民命寬物力五事詔所司議行出巡山海居庸二關九年春上言賊最梟悍者闖將老回回數種即前

日困棧道之賊總督陳奇瑜故縱之乞立正大法警厲疆臣帝是之六月

大清兵入喜峰口肇坤激眾往禦身中四矢兩刃而死七月大清兵自天壽山入圍昌平守陵太監王希忠總兵官巢丕昌督餉戶部主事王桂趙悅攝知州事保定通判王禹佐等分門拒守有降丁二千為內應城遂破丕昌出降桂悅禹佐希忠及判官胡惟忠吏目郭永學正解懷亮訓導常時光守備咸貞吉皆死之禹佐子亦從父死桂黃岡舉人督餉昌平以南城最衝身往扼之俄西城失守被執死之妻妾子女暨家眾二十七人悉赴井死悅以公事赴昌平遂遇難未幾大兵攻順義知縣上官蓋字忠赤曲沃人起家鄉舉廉執有





聲在官三年薦章十餘上與游擊治國器都指揮蘇時雨等拒守城破盡自經國器時雨及訓導陳所蘊皆死尋破寶坻知縣趙國鼎主簿樊樞典史張六師訓導趙士秀皆死國鼎山西樂平人鄉試第一崇禎七年進士破定興教諭灤州熊嘉志殉節死破安肅知縣臨清鄭延任與妻同殉教諭靈壽耿三麟亦死之事聞贈肇坤大理卿子祭葬官一子桂悅竝太僕少卿廕子祭葬餘贈卹如制

劉廷訓順天通州人由歲貢生為吳橋訓導崇禎十一年大清兵入畿內知縣李綦隆欲遁廷訓邀止之與其守外圍將合綦隆縋城走廷訓急趨城上語守者曰守死逃亦死曷死於守為忠義鬼乎眾泣諾乃堅拒三晝夜城外發矢口月

廷訓受傷束胸力戰又中六矢乃死踰月其子啓棺更斂面如生當是時畿輔諸郡悉被兵長吏多望風遁失城四十有八深州孫士美任丘白慧元慶都黃承宗靈壽馮登鰲文安王鑰蠡縣王采新河崔賢鹽山陳誌固城王九鼎皆以殉難聞他若青縣張文煥興濟錢珍慶雲陳緘城破被殺教官死難者有張純儒唐一中鄉官則喬若安李禎宁魏克家李崇德董祚而棄城者綦隆等十人皆坐死士美青浦人由鄉舉授舒城教諭崇禎八年春賊來犯縣令以公事出土美代守七十餘日城以全明年擢知深州大清兵至力守三日城破自到於角樓父訥亦自縊一家死者十三人贈太僕少卿訥亦被旌慧元青澗人崇禎七年進



士居官善祛蠹吏民畏之九年

大清兵臨城堅守有功命減俸行取會與大奄有隙撫其罪於帝命逮治之未行而兵抵城下乃與代者李廉仲共守無何廉仲絕城遁慧元躬擐甲胄與鄉官李禎宁防禦甚力及城破慧元一門俱死事定廉仲弟芳仲偽以他人屍爲兄屍拜疏求卹禎宁子給事中士焜力言其偽乃寢芳仲奏而慧元贈僉事承宗有吏才庶政具舉未詳何許人登鰲膚施人起家鄉舉其從父大緯爲蠡縣訓導亦死鎬武功人舉人采澤州人進士賢代州人舉人誌九鼎未詳何許人誌以敵退弛備俄

大兵假援軍突入遂自經九鼎戰死城上承宗等皆贈恤有

差純儒新安人爲臨城訓導率諸生共守城破死之一中全州人由舉人爲鉅鹿教諭抗節死

喬若雯臨城人萬曆四十七年進士授中書舍人遷禮部主事崇禎元年春廷臣爭擊魏忠賢黨若雯亦兩疏劾兵部侍郎秦士文御史張訥智鋌備列其傾邪狀尋言故輔魏廣微罪惡滔天致先帝冒桓靈之名忠賢肆十常侍之毒而其徒陳九疇張訥智鋌爲之鷹犬專噬善類廢微之罪不下忠賢九疇等之罪不減彪虎乞死者削其官階生者殺之荒喬帝責其詆毀先帝而九疇等下所司行遣若雯尋改吏部主事遷員外郎出爲兗州知府剔除積弊豪猾斂手以疾歸士民遮道泣送及臨城失守若雯端坐按劍以待遂被殺贈太常



少卿李禎宁任丘人萬曆三十八年進士歷官山西按察使  
罷歸佐白慧元拒守城破率家衆格鬪身中數槊而死一門  
從死者數人魏克家高陽人李崇德青縣人董祚隆平人皆  
舉人克家爲鄒平知縣有善政崇德歷戶部員外郎祚未仕  
竝以城破殉難贈恤有差

張秉文字含之桐城人祖淳官參政事具循吏傳秉文舉萬  
曆三十八年進士授歸安知縣調徽州教授屢遷戶部郎中  
撫州知府江西副使以疾歸起官湖廣改福建右參政與平  
海寇李魁奇崇禎中歷廣東按察使右布政使調山東爲左  
十一年冬

大清兵自畿輔南下本兵楊嗣昌檄山東巡撫顏繼祖移師

德州於是濟南空虛止鄉兵五百萊州援兵七百勢弱不足  
守巡按御史宋學朱方行部章丘聞警馳還與秉文及副使  
周之訓翁鴻業參議鄧謙鹽運使唐世熊等議守城而連章  
告急於朝嗣昌無以應督師中官高起潛擁重兵臨清不救  
大將祖寬倪寵等亦觀望

大清兵徇下州縣十有六遂臨濟南城學朱等分門死守晝  
夜不解甲外圍急援兵竟不至明年正月二日城破秉文偕  
妻方妾陳投水死之訓謙世熊及濟南知府苟好善同知陳  
虞胤通判熊烈獻歷城知縣韓承宣皆死焉德王由樞被執  
秉文贈太常卿之訓謙光祿卿承宣光祿少卿皆建特祠餘  
贈恤如制巡按學朱死不得屍疑未實獨格不予其子訴於



朝不聽福王時子再訴乃贈大理卿鴻業及推官陸燦不知所終贈恤亦不及學朱字用晦長洲人崇禎四年進士爲御史嘗抗疏劾楊嗣昌田惟嘉時論壯之之訓黃岡人進士累官浙江按察使坐事貶官被薦未遷擢而遭難望闕再拜與妻劉偕死闔門殉之謙孝感人進士戰於城上與季父有禎偕死母莫氏匿民間不食死族戚儻從死者四十餘人世熊灌陽人舉人分守西門被殺好善醴泉人進士虞胤未詳烈獻黃陂人貢生城破與二子俱死承宣大學士爌孫進士與妻妾同死有劉大年者江西廣昌人官兵部主事奉使南京還朝道歷城城破遂抗節死贈光祿少卿時大清兵所破州縣守令失城者皆論死而臨邑宋希堯博平

張列宿茌平黃建極武城李承芳丘縣高重光皆以死節蒙贈卹重光字秀恆保定人由貢生爲柏鄉訓導率蒼頭擊盜以全城遂擢爲令及兵至吏民欲負之逃重光不可抱印赴井死其里居搢紳被難者恩縣李應薦天啓時官御史以附魏忠賢麗名逆案至是捐貲募士佐有司力守城破身被數刃而死歷城劉化光與子漢儀先後舉於鄉父子俱守城力戰死贈卹有差

趙輝字黃如河津人崇禎七年進士授戶部主事兩督倉儲力祛奸蠹歷兵部郎中遷霸州兵備副使十五年十一月大清兵入畿輔輝卽偕知州丁師義里居參政李時芹等爲城守計踰月被圍督士民固拒援軍不至城遂破輝整冠帶



自盡季子琬同死師義時堯皆死之贈輝光祿卿師義參議時堯太常卿師義楚雄人選貢生時堯進士累官吏部郎中分守常鎮右參政

顏眉紹字虞明曲阜人崇禎四年進士除鳳陽知縣調繁江都行取給事中陳啓新許其鑽求翰林調於外尋由邯鄲知縣遷真定同知守城勦寇有功十五年擢河間知府比歲大饑死囚載道寇盜充斥拊循甚至閏十一月

大清兵臨城與參議趙珽同知姚汝明知縣陳三接等堅守援兵雲集率逗遛眉紹知城必破預集一家老稚於室中積薪繞之而身往城上策戰守及城破趨歸官舍舉火焚室衣冠北向再拜躍入火中同死珽慈谿人崇禎元年進士歷知

南安侯官二縣屢遷河間兵備僉事一門十四人悉被難汝明夏縣人天啓元年舉於鄉性孝友崇禎間歲大歉傾廩賑濟立義冢瘞暴骸授蠡縣知縣歲凶肅政甚備聞鄉邑又饑貽書其子令賑救如初後官河間與妾任同死三接文水人舉崇禎六年鄉試知河間縣歲旱饑人相食三接至雨即降有疑獄數年不決三接立決之妻武氏賢三接見封疆多故遣之歸答曰夫死忠妻死節分也三接巷戰死武亦從之珽贈太僕卿眉紹光祿卿汝明三接並僉事有周而淳者掖縣人初拜兵科給事與同官六人分督畿輔諸郡城守事淳甫至河間城即被圍竟與諸臣同死贈太常少卿吉孔嘉洋縣人幼時愬父冤於巡按御史獲釋以孝稱舉崇



禎三年鄉試授寧津知縣蠲繁苛除寇闖邑頌德遷順德同知調直定尋擢順德知府十五年冬

大清兵臨城悉力捍禦力屈城破與妻張氏長子貢生惠迪次子婦王氏並死焉贈太僕少卿妻子皆獲旌畿內以守城被難者又有王端冕唐鉉高維岱之屬端冕字服先江陵人由舉人爲趙州知州以廉惠得民城破被執死之教諭陳廣心元城人起家乙榜城將破衣冠危坐以待諸子環泣請避厲聲曰吾平生所學何事豈爲兒女子戀戀邪遂被殺訓導王一統成安人居家多義行死節明倫堂鉉字節玉睢州人崇禎七年進士歷定州知州死之維岱昌邑人舉於鄉爲永清知縣視事甫旬餘卽遇變一門死之典史李時正教諭邸

養性鄉官劉維蕙同死清豐破教諭曹一貞訓導董調元亦死焉鉉贈右參議維岱僉事餘贈恤有差

傅梅邢臺人萬曆十九年舉於鄉除登封知縣善政具舉公餘撰嵩史十三篇遷刑部主事張差以挺擊繫獄諸司官胡士相勞承嘉等將以瘋癲蔽獄梅憤夜詣同官陸夢龍曰人情佐奸而甘心儲皇吾雖恤刑山右當上疏極論君與我共事乎時侍郎張問達署部事夢龍曰張公遇我厚未嘗力爭遠上疏若張公何當更言之明日夢龍與梅見問達反覆言之問達乃令會士相等再鞫及差供至擊皇太子士相卽推案起獄竟不具梅益憤已問達納夢龍言再令十三司會鞫梅後至衆問獄有兩議君如何梅曰奸人欲害皇太子安得



持兩議果爾請立一標為皇太子者左為賊者右復有言當  
慎者王事王德坤面發赤厲聲曰奸人欲害儲皇乃不敢詰  
何言慎也既而會鞫差始成獄比差棄市梅慮其潛易躬請  
監刑自是為時所疾以京察奪其官天啓初御史焦源溥訟  
於朝起陝西布政司都事都御史馮從吾推引之擢戶部主  
事六年春御史曾應瑞劾其呈身從吾遂削籍崇禎中起故  
官歷台州知府解職歸十五年冬畿輔戒嚴梅捐二千金與  
中書舍人孟魯鉢張鳳鳴佐順德知府吉孔嘉募兵共守及  
城破皆死之十七年三月贈梅太常少卿魯鉢工部主事時  
鄉居死難者清豐則吏部郎中李其紀黃州推官侶鶴舉富  
陽知縣杜斗愚南樂則監生鄭獻書河間則襄陽知縣賈太

初永年則山東副使申為憲其紀太初為憲皆進士斗愚舉  
人

邢國璽長葛人崇禎七年進士授濰縣知縣改建石城盡心  
民事莊烈帝以修城郭練民兵儲糧糧備戎器四事課天下  
有司率視為具文惟國璽奉行如詔上官交薦遷戶部主事  
運道梗於盜有議開膠萊河者國璽力陳其便擢登萊兵備  
僉事經度河道十五年畿輔戒嚴部檄徵山東兵入衛國璽  
監督至龍岡猝遇

大清兵部卒驚懼欲竄國璽叱止之身先搏戰矢刃交加墮  
馬死久之撫按不奏帝降旨嚴責乃具聞贈恤如制當是時  
大清兵南下山東所至如破竹直抵海州贛榆沐陽豐沛列



城將吏或棄城遁或獻金帛迎降其身死封疆者有馮守禮  
張日新張子卿朱迴添任萬民文昌時李耿吳良能吳汝宗  
周啓元劉光先十一人守禮猗氏人舉於鄉縣令有疑獄語  
訴者得馮孝廉一刺獄卽解其人懷金以告拒不聽選平定  
州學正諸生兄弟爭產相訐餽以金守禮嚴却之開示以友  
梯皆解去由莒州學正遷知萊蕪至是與二子攄奇拱竝  
自殺日新浙江建德人由歲貢生爲宿松訓導齊東教諭見  
海內寇起時與諸生講藝習射招土寇安守夏降之及齊東  
被圍與守夏登陴守城陷及子光裔死之妻方氏立自刎守  
夏亦從死子卿知陽信城破殉難迴添者瀋陽宗室也居潞  
安由宗學貢生爲鄒平知縣城失守全節以死萬民陽曲人

爲諸生見鄉郡被寇草救時八議守城二十策獻之當事果  
得其用以保舉授武城知縣在職三年有能聲竟殉城死昌  
時全州人舉於鄉爲臨淄知縣以廉慎得民城受圍與訓導  
申周輔共守城破舉家自焚周輔亦被難耿大興人崇禎十  
三年進士知壽光自縊城上良能遼東葢州人舉順天鄉試  
知滕縣捍禦山寇邑賴以安及是城將破盡殺家屬拜母出  
力戰死汝宗寧洋人知東阿城失守死之啓元黃岡人舉於  
鄉知高苑縣城破朱衣坐堂上死之光先知豐縣  
大清兵二千騎營西城外不攻夜一人自營逸出語城上人  
曰得梯卽攻不信又有逸者曰梯成立攻矣婦人亦自營出  
曰盡甲矣昧爽突攻西南甌城中力禦之忽已登西北甌光



先死焉

張振秀臨清人萬曆三十八年進士授肥鄉知縣以才調丞平遷兵部主事泰昌元年改吏部更歷四司至文選員外郎乞假歸崇禎改元起驗封郎中歷考功文選二司時魏忠賢已殛清奸黨登賢良振秀有力焉擢太常少卿督四夷館坐事落職歸十五年閏十一月

大清兵圍河間遠近震恐臨清總兵官劉源清偕權關主事陳典言同知路如瀛判官徐應芳吏目陳翔龍在籍兵部侍郎張宗衡員外郎邢泰吉臨汾知縣尹任及振秀等為守禦備未幾城被圍力拒數日援不至城破並死之天津參將賀秉鉞以扶父櫬至臨清巷戰終日矢盡被執死之輿言未詳

如瀛陵川人應芳臨川人翔龍蕭山人泰吉任皆進士宗衡自有傳源清澤清弟贈榮祿大夫太子少保秉鉞太寧左衛人崇禎四年登武科一甲第三人其時城破殉難者有兗州范淑泰壽張王大年曹州楚煙滕縣劉弘緒數人大年舉進士歷御史加太僕少卿以附魏忠賢名挂逆案至是盡節而死煙舉進士歷龍谿贊皇二縣遷戶部主事解職歸及城失守力抗拒子鳳苞以身翼之皆被殺妻趙觸柱死弘緒由進士歷洛陽知縣車駕郎中遇變死

鄧藩錫字晉伯金壇人崇禎七年進士歷知龍巖嶸二縣遷南京兵部主事十五年遷兗州知府時中州地殘破已盡兗與接壤土寇蜂起益以飢饉人不聊生藩錫區處家務以一



妾一穉子行甫抵任已聞

大清兵入塞亟繕守具纔數旬四萬騎已薄城下走告魯王曰郡有吏國有王猶同舟也列城失守皆由貴家惜金錢而令甕人餓夫列陣捍禦夫城郭者我之命也財賄者人之命也我不能畀彼以命而望彼畀我以命乎王誠散積儲以鼓士氣城猶可存不然大事一去悔無及矣王不能從藩錫與監軍參議王維新同知譚絲曾文蔚通判閻鼎推官李昌期滋陽知縣郝芳聲副將丁文明王府長史俞起蛟及里居給事中范淑泰等分門死守至十二月八日力不支城破維新猶力戰被二十一創乃死藩錫受縛不降被殺妾聞攜穉子投井死魯王以派亦被殺昌期永年人芳聲忻州人竝起家

進士昌期嘗監軍破土寇萬眾推其才芳聲治縣有聲至是皆死有樊吉人者元城人由進士知滋陽以才擢兵部主事再擢山東兵備僉事未行遇變自刎死起蛟錢塘人由貢生歷官魯府左長史相憲王及惠王立欲易世子起蛟力諫乃己世子嗣位值歲凶勸王賑貸自出粟二千石佐之大盜李青山率眾來犯偕淑泰出擊大破其眾及王被難起蛟率親屬二十三人殉之文明亦戰死事聞贈維新光祿卿藩錫太僕少卿昌期僉事餘贈卹有差

范淑泰字通也滋陽人崇禎元年進士授行人五年冬擢工科給事中上疏言綜核之弊以規帝而以仁敬寬簡四說進帝以寬簡非所急不納其言已復陳時政五事言王勢不可



使孤國體不可使卑王章不可使紊宸斷不可使偏臣節不可使偷語多刺時事報聞復極陳刑獄繁多乞敕刑官疏理帝褒納之流賊犯河南追論先任巡撫樊尙璟罪又劾總兵鄧玘淫掠狀中官張彝憲言天下逋賦至一千七百餘萬請遣科道官督徵帝大怒責撫按回奏淑泰言民貧盜起逋賦難追督不從給事莊鼇獻章正宸建言下吏抗疏救之吏部張捷薦逆黨呂純如淑泰極論其謬并論大學士王應熊朋比行私無何又劾捷徇應熊意用其私人王維章撫蜀言維章官西寧坐加徵激變落職閒任捷朦朧啓事明肆奸欺帝責捷自陳捷詆淑泰黨同伐異帝不問已復言維章爲雲南布政賊私狼籍捷應熊納其厚賄爲門客所首而錦衣不敢

問移之刑部員外郎楊惕如遂苟且畢事帝亦不聽時皇陵被毀巡撫楊一鵬得罪應熊以座主故力庇之淑泰發其停匿章奏狀帝亦不究淑泰乃撫應熊納賄數事上之應熊捐貲助陵工淑泰又劾其召寇庇奸帝責以挾私求勝終不納十一年冬上疏言今以措餉故至搜括借助卽行之而得再有兵事能復行乎治不規其可久徒倉皇於補救之術非所以爲忠也陛下方以清節風天下而乃條敘百官金錢於多寡之間是教之貪也至借貸之說尤不可行京師根本重地邇者物力困竭富商大賈大半旋歸內不安何以攘外乞立寢其說又言強兵莫如行法今之兵以索餉則強以赴敵則弱以殺良冒功則強以除暴救民則弱請明示法令諸將能



用命殺賊者立擢為大將否則死無赦無以降級戴罪徒為不切身之痛癢帝是其言十五年累官吏科左給事中疏言天下苦兵十餘年外無死綏之七內無握勝之臣悠悠歲時坐觀成敗失治平之道一矣雨澤不降兵役繁興百姓死傷相望猶復追呼不休以致人心思亂延盜開門失治平之道二矣加派二千餘萬損民長寇誰為厲階既括餉以養兵乃呼餉則有禦寇則無失治平之道三矣師行糧從今取給於經過之州縣奴辱長吏鞭撻小民劫財掠妻馬首如錯失治平之道四矣乞召密勿大臣急圖馭將足兵安民攘寇方略勿徒飾太平之容致天下日壞也帝然之其秋出典浙江鄉試事竣還家十二月

大清兵圍兗州淑泰竭力固守城破死之詔贈太僕少卿官其一子

張焜芳會稽人崇禎元年進士授南平知縣擢南京戶科給事中十一年春疏薦黃道周惠世揚陳子壯金光辰而為舊輔文震孟請恤帝以沽名市恩切責之中官楊顯名監督兩淮鹽務嘗劾逮巡鹽御史張養高欽舜未幾以南科缺人請用南道御史成勇改補帝怒將罪之而焜芳適糾太僕少卿史堃為堃所訐遂罷職堃清苑人為御史無行善結納中官以搏擊劉鴻訓錢龍錫為王永光死黨巡按淮揚先任御史曹暹未半年積贓罰十七萬猝外轉支取十之一餘盡為堃有堃嘗攝巡鹽事又掩取前官張錫命貯庫銀二十一萬暨



回道都御史陳于廷擬注下考而于廷子貞裕嘗納堇金堇把持之于廷遂不敢問至是以少卿家居會檢討楊士聰劾吏部尙書田維嘉納周汝弼金八千推爲延綏巡撫堇居間且訐其侵盜鹽課事得旨令堇自陳堇詆言臣孤立寡倚屢糾奸慝向年文震孟姚希孟爲詞臣之雄震孟借虛名入閣行私罷政復草疏藁募成德代上臣曾有綸扉之線索一斷議論之風雨寂然二語大犯時忌故士聰假考選事以線索二字陷臣且云臣指佞如仇奸黨切齒士聰曾受進士宋琮萬金爲營館選今反以汝弼事相誣若鹽課當問錫命奈何以誣臣請下廷臣會勘且敕淮揚中官顯名核奏臣心迹自明時維嘉家人已下錦衣獄命俟訊明奏奪已而錫命子沅

言臣父已歿先所貯庫銀堇實接收閣臣擬嚴旨以進內廷多助堇者但下所司焜芳聞亟劾堇侵盜有據且與中書汪機晝夜酣飲俾女優侑觴官箴盡廢勒富人于承祖萬金事發後使家人齎重貲潛赴揚州點吏睢承吾家圖改舊籍帝怒革堇職并機承吾提訊堇攜貲數萬入都王薛國觀邸謀既定出投獄疏稱曾劾鴻訓龍錫爲奸黨構陷焜芳乃內閣中書炳芳兄向來上指洩露皆炳芳爲之其弟煒芳以長史謀改同知爲知縣虞國鎮營考選誑銀萬三千以八千昇科臣馮元颺使代營餘皆入已疏入閣臣屢擬嚴旨帝皆不從止奪炳芳職候訊及顯名劾疏上力爲堇解而不能諱者六萬金以故堇久稽獄中會有兵事獄遂不結堇尋瘐死焜芳



亦移疾歸後國觀獲譴堊所寄銀猶在其邸為堊家人所首  
事大露以既死不復究十六年正月焜芳北上抵臨清遇  
大清兵與諸生馬之駟之駟俱被執死之其妻妾聞之赴井  
死福王時贈太常少卿予祭葬

明史葉

列傳第一百六十八終

葉 焜芳

寬政戊午



